


書叢學國生學

世說新語

晉朝 羅 邁 註

商務印書館發行



85
86
2

857.135
890
2

書叢學國生學

世

說


新

語

編輯主幹

朱經農
王岫廬

選註者
崔朝慶



商務印書館發行



3 1760 9883 2

序

宋臨川王劉義慶所撰之世說新語，爲清四庫全書子部小說家類第二部。小說家言之流別，凡有三派：其一敘述雜事；其一記錄異聞；其一綴輯瑣語。臨川此書，紀錄自漢末迄東晉之雜事，兼述諸名流之音辭，雖屬於子部，而近於雜史，觀此可以見當時朝野上下之風尚，而竹林蘭亭諸公之言論丰采，躍然紙上，如聞其聲，如覩其人，誠小說之傑作也。梁劉孝標爲之注釋，補其闕而剔其訛，亦爲藝林所珍重。唐史臣所著晉書紀傳，或不及是書之精美焉。臨川生於晉末，賢士大夫之流風餘韻，猶未盡泯滅，故撰爲此書，具有晉人簡約玄澹之旨趣。今所傳者有二本：一爲王世貞所刊，刪削原文舊注，已失匡廬真面；一爲袁褱翻雕，陸游重刻之本，較爲完善，書中句或鉤棘語近方言，千數百年來，未能有人釐正，美猶

有憾，此可視若史之闕文者也。茲爲便利初學計，選注爲一小冊，雖云管中窺豹，僅見一斑，然亦足以知晉世清談之大概已。

民國十六年一月

編者識

世說新語目錄

德行第一	一
言語第二	九
政事第三	二五
文學第四	三〇
方正第五	四四
雅量第六	五五
識鑒第七	六〇
賞譽第八上	六五
賞譽第八下	六九

品藻第九	七六
規箴第十	八六
捷悟第十一	九二
夙惠第十二	九四
豪爽第十三	九六
容止第十四	九八
自新第十五	一〇二
企羨第十六	一〇四
傷逝第十七	一〇六
棲逸第十八	一〇九
賢媛第十九	一一二
術解第二十	一二一

巧藝第二十一	一二四
寵禮第二十二	一二七
任誕第二十三	一二八
簡傲第二十四	一三六
排調第二十五	一三九
輕詆第二十六	一四八
假譎第二十七	一五〇
黜免第二十八	一五二
儉嗇第二十九	一五四
汰侈第三十	一五六
忿狷第三十一	一五八
讒險第三十二	一六〇

尤悔第三十三……………一六二

紕漏第三十四……………一六五

惑溺第三十五……………一六六

仇隙第三十六……………一六八

世說新語釋名 (依書中初見之次序)

世說新語釋名（依書中初見之次序）

陳寔字仲弓 常稱太丘

荀淑字季和 或稱朗陵

陳羣字長文 或稱司空

裴楷字叔則 或稱令公

王戎字濬沖 常稱安豐

王澄字平子 或稱阿平

樂廣字彥輔 常稱樂令

庾亮字元規 或稱庾公

阮裕字思曠 或稱光祿

或稱文康

謝安字安石 或稱太傅 或稱謝公 或稱文靖

褚裒字季野 或稱褚公 或稱太傅

韓伯字康伯 或稱豫章 或稱太常

桓玄字敬道 或稱南郡 或稱桓公 或稱義興

殷仲堪 常稱荊州

司馬昭字子上 稱爲文王 或稱文帝

嵇康字叔夜 或稱中散

曹丕字子桓 稱爲文帝

鍾繇字元常 或稱太傅

司馬師字子元 稱爲景王

王衍字夷甫 常稱太尉

裴頠字逸民 或稱僕射 或稱成公

張華字茂先 或稱張公

周顛字伯仁 常稱周侯

衛玠字叔寶 或稱洗馬

王導字茂弘 或稱丞相 或稱王公

郗鑿字道徽 或稱太尉 或稱太傅

王敦字處仲 常稱大將軍

謝尚字仁祖 或稱鎮西 或稱謝掾

謝鯤字幼輿 或稱豫章

庾翼字稚恭 或稱小庾

司馬昱字道萬 常稱簡文 或稱太宗 或稱會稽王 或稱撫軍

桓溫字元子 常稱桓公 或稱宣武 或稱大司馬

劉惔字真長 常稱劉尹

許詢字玄度 常稱許掾

王脩字敬仁 常稱荀子

王羲之字逸少 常稱右軍 或稱臨川

謝朗字長度 或稱胡兒 或稱東陽

荀羨字全則 或稱中郎

山濤字巨源 或稱山公

謝玄字幼度 或稱車騎

殷浩字淵源 或稱揚州 或稱中軍 或稱阿源 或稱殷侯

司馬道子 或稱太傅

王承字安期 或稱東海

陶侃字士行 或稱陶公

陸玩字士瑤 或稱太尉

王濛字仲祖 常稱長史

支遁字道林 或稱林公 或稱支法師 或稱林道人

何充字次道 或稱驃騎 或稱揚州

王忱字元達 或稱佛大 或稱王大 或稱建武 或稱荊州 或稱阿大

王珉字季琰 或稱僧彌 或稱小令

王珣字元琳 常稱東亭

張玄字祖希 或稱冠軍

惠遠 常稱遠公

曹植字子建 稱爲東阿王

庾敳字子嵩 或稱中郎

孫綽字興公 或稱長樂

陸機字士衡 或稱平原

司馬懿字仲達 或稱宣帝 或稱宣王

曹髦字彥士 稱爲高貴鄉公

荀勗字公曾 或稱濟北

陸雲字士龍 或稱清河

司馬睿字景文 或稱元皇帝 或稱元帝 或稱中宗 或稱元皇

王胡之字修齡 或稱司州

范寧字武子 或稱豫章

王坦之字文度 或稱安北 或稱中郎

戴逵字安道 或稱戴公

曹操字孟德 或稱曹公 或稱魏武 或稱魏王

王湛字處沖 或稱汝南

王渾字玄沖 或稱司徒 或稱京陵

蔡謨字道明 或稱司徒 或稱蔡公

王述字懷祖 常稱藍田 或稱宛陵

桓彝字茂倫 或稱廷尉

王洽字敬和 或稱領軍

鄧攸字伯道 或稱僕射

王徽之字子猷 或稱黃門

桓沖字玄叔 或稱車騎

諸葛恢字道明 或稱諸葛令

郗恢字道胤 或稱尙書 或稱雍州

阮籍字嗣宗 或稱阮公 或稱步兵

王昶字文舒 或稱司空

郗愔字方回 或稱司空 或稱郗公

郝曇字重淵 或稱中郎

賀循字彥先 或稱司空

祖逖字士雅 或稱車騎

琅邪王氏與太原王氏之世譜

原書之首有世譜久佚。因書中以此二族之人爲最多。故敘其世系。以便稽考。

琅邪王氏見於此書者共二十一人

王祥，字休徵，晉太保。

王導，字茂弘，祥弟，覽長子，裁之子。

王洽，字敬和，導之第三子。

王珣，字元琳，洽之長子。

王珉，字季琰，珣之弟。

王含，字處弘，覽次子，基之子。

王敦，字處仲，含之弟。

王羲之，字逸少。覽第四子正之長子曠之子。

王凝之，字叔平。羲之第二子。

王徽之，字子猷。羲之第五子。

王楨之，字公幹。徽之之子。

王操之，字子重。徽之之弟。

王獻之，字子敬。操之之弟。

王胡之，字修齡。覽第四子正之次子虞之子。

王渾，字長原。祥之族子。

王戎，字濬沖。渾之子。

王綏，字萬子。戎之子。

王衍，字夷甫。戎之從弟。

王玄，字眉子。衍之子。

王詡，字季胤，衍之弟。

王澄，字平子，衍之弟。

太原王氏見於此書者共十六人

王昶，字文舒，魏司空。

王渾，字玄沖，昶之長子。

王濟，字武子，渾之子。

王湛，字處沖，昶之次子。

王承，字安期，湛之子。

王述，字懷祖，承之子。

王坦之，字文度，述之長子。

王綏，字彥猷，坦之次子，愉之子。

王禧之，字文邵，述之次子。

王國寶。坦之第三子。

王忱，字元達。坦之第四子。

王濛，字仲祖。太原之另一支。

王脩，字敬仁。濛之子。

王恭，字孝伯。濛次子蘊之子。

王爽，字季明。恭之弟。

王緒，字仲業。國寶之從弟。

德行第一

陳仲舉言爲士則行爲世範。登車攬轡，有澄清天下之志。爲豫章太守。至，便問徐孺子所在，欲先看之。主簿白：「羣情欲府君先入廨。」陳曰：「武王式商容之閭，席不暇煖。吾之禮賢，有何不可。」

○漢陳蕃，字仲舉，汝南人。桓帝末，官至太傅。與大將軍竇武謀誅宦官，反爲所害。○豫章卽今

江西之南昌。蕃爲尙書時，以忠正忤貴戚，遷豫章太守。○徐穉，字孺子，豫章人。超世絕俗，蕃在

豫章爲穉獨設一榻，去則懸之，見禮如此。○公廨也。○商容，殷之賢人，紂所貶退，武王式其

閭。卷式者，車上之橫木。男子立乘，有所敬則俯而憑式，遂以式爲敬名。

郭林宗至汝南，造袁奉高，車不停軌，鸞不輟軛。詣黃叔度，乃彌日信宿，人問其故，林宗曰：「叔度汪汪如萬頃之陂，澄之不清，擾之不濁。其器深

廣，難測量也。」

○漢郭泰，字林宗，太原人。李元禮一見稱之曰：「吾見士多矣，無如林宗者也。」○即今河南

之汝南。○袁宏，字奉高，愷陽人。○鸞鳥，雌曰和，雄曰鸞。禮云：「在輿則聞鸞和之聲。」古時

鸞與順動。此鳥飛集車上，雄鳴於前，雌應於後。○黃憲，字叔度，汝南人。時論者咸云：「顏子復

生。」父爲牛醫。

李元禮○風格秀整，高自標持，欲以天下名教是非爲己任。後進之士，有升

其堂者，皆以爲登龍門。○

○漢李膺，字元禮，潁川人。有文武備才。○在山西省河津縣，懸崖湍急，形如門闕，乃禹治河鑿

通。龜魚之屬莫能上，上則化爲龍，故名曰龍門。

陳太丘○詣荀朗陵，○貧儉無僕役。乃使元方○將車，季方○持杖後從。長

文○尙小，載箬車中。既至，荀使叔慈○應門，慈明○行酒，餘六龍○下食。文若○

亦小，坐箬鄰前。于時太史○奏真人○東行。

○漢陳寔，字仲弓，潁川人，爲聞喜令，太丘長。○荀淑，字季和，潁川人，爲朗陵侯相。○寔長子

紀，字元方。○寔少子謙，字季方。○紀之子羣，字長文，寔嘗謂宗人曰：「此兒必與吾宗。」

○淑第三子靖，字叔慈。○淑第六子爽，字慈明，舉至孝，累官至司空。○淑有八子，儉、鯁、靖、

汪、爽、肅、敷，時人稱爲八龍。○淑孫瓌，字文若，爲漢侍中，守尚書令。○掌天文者。○莊子稱

關尹老聃爲古之博大真人，真者，精誠之至也。

荀巨伯○遠看友人疾，值胡賊攻郡。友人語巨伯曰：「吾今死矣！子可去。」

巨伯曰：「遠來相視，子令吾去。敗義以求生，豈荀巨伯所行邪？」賊既至，謂巨伯

曰：「大軍至，一郡盡空。汝何男子，而敢獨止？」巨伯曰：「友人有疾，不忍委之，寧

以我身代友人命。」賊相謂曰：「我輩無義之人，而入有義之國。」遂班軍而還，

一郡並獲全。

○漢桓帝時人，亦出潁川。

管寧○華歆○共園中鋤菜，見地有片金。管揮鋤與瓦石不異，華捉而擲去。

之。又嘗同席讀書，有乘軒冕過門者，寧讀如故，歛廢書出看。寧割席分坐，曰：『子非吾友也。』

○魏管寧，字幼安，北海人。齊相管仲之後。○華歆，字子魚，平原人。

王祥○事後母朱夫人甚謹。家有一李樹，結子殊好。母恆使守之，時風雨忽至，祥抱樹而泣。祥嘗在別牀眠，母自往闔斫之。值祥私起，空斫得被。既還，知母憾之不已，因跪前請死。母於是感悟，愛之如己子。

○晉王祥，字休徵，琅邪人。官至太保。

梁王趙王○國之近屬，○貴重當時。裴令公○歲請二國租錢數百萬，以恤中表○之貧者。或譏之曰：『何以乞物行惠？』裴曰：『損有餘，補不足，天之道也。』

○晉宣帝張夫人，生梁孝王彤，字子徵，位至太宰。桓夫人生趙王倫，字子彝，位至相國。○屬者，

昭穆相次序也。○裴楷，字叔則，河東聞喜人。司空秀之從弟，精易義，累遷河南尹，中書令。○

中表，猶言內外。父之姊妹之子爲外兄弟，母之兄弟姊妹之子爲內兄弟，故有中表之稱。

王戎^①父渾^②，有令名，官至涼州^③刺史。渾薨，所歷九郡義故，懷其德惠，相率致賻數百萬，戎悉不受。

^①晉王戎，字濬冲，琅邪人。太保辟之宗族，累遷荊州刺史，以平吳功，封安豐侯。^②渾，字長原，幽

州刺史王雄之子。太原亦有一王渾，乃王濟之父也。^③即今甘肅武威縣。

王平子^④，胡母彥國^⑤，諸人皆以任放爲達，或有裸體者。樂廣^⑥笑曰：「名教^⑦中自有樂地，何爲乃爾也？」

^④晉王澄，字平子，有達識，荊州刺史。^⑤胡母輔之，字彥國，泰山奉高人。湘州刺史。^⑥樂廣，字

彥輔，南陽人。官至尙書令。^⑦名謂名分，教謂教化，凡彝倫之所關，聖賢之所訓，皆是也。

顧榮^⑧在洛陽，嘗應人請，覺行炙^⑨，人有欲炙之色，因輟已施焉，同坐嗤之。榮曰：「豈有終日執之而不知其味者乎？」後遭亂渡江，每經危急，常有一人左右已，問其所以，乃受炙人也。

^⑧晉顧榮，字彥先，吳郡人。其先越王勾踐之支庶，封於顯邑，子孫遂氏焉，世爲吳著姓。^⑨地當

洛水之北，周平王東遷居此。 ①傳遞膳羞也。

庾公 ①乘馬有的盧， ②或語令賣去。庾云：『賣之必有買者，即復害其生，寧可不安已而移於他人哉？昔孫叔敖 ③殺兩頭蛇 ④以為後人，古之美談。效之，不亦達乎？』

①晉庾亮，字元規，潁川人，明穆皇后長兄也。累遷征西大將軍，荊州刺史。 ②馬白額入口至齒

者，名曰榆鴈，一名的盧，奴乘客死，主乘棄市，凶馬也。 ③楚之令尹。 ④孫叔敖見時，見兩頭蛇，

殺而埋之。歸見其母泣，問其故，對曰：『夫見兩頭蛇者必死，今出見之，故爾。』母曰：『蛇今安在？』

對曰：『恐後人見，殺而埋之矣。』母曰：『夫有陰德，必有陽報，爾無憂也。』

阮光祿 ①在剡。 ②曾有好車，借者無不皆給。有人葬母，意欲借而不敢言。阮後聞之，歎曰：『吾有車而使人不敢借，何以車為？』遂焚之。

①晉阮裕，字思曠，陳留人。累遷侍中，以疾去官。後徵金紫光祿大夫，不就。 ②會稽山名。

謝奕 ①作剡令。有一老翁犯法，謝以醇酒罰之。乃至過醉，而猶未已。太傅

○時年七八歲，箸青布袴，在兄鄰邊坐。諫曰：「阿兄，老翁可念，何可作此。」奕於是改容曰：「阿奴，欲放去耶？」遂遣之。

○晉謝奕，字無奕，陳郡陽夏人。官至豫州刺史。○即今浙江之嵊縣。○謝安，字安石，爲桓溫

司馬，累遷至太保，錄尚書事，贈太傅。○謝安小字。

謝太傅絕重褚公。○常稱「褚季野雖不言，而四時之氣亦備。」

○晉褚裒，字季野，陽翟人。累遷江表二州刺史，贈侍中太傅。

范宣○年八歲，後園挑菜，誤傷指，大啼。人問痛邪？答曰：「非爲痛。身體髮膚，不敢毀傷，是以啼耳。」宣潔行廉約，韓豫章○遺絹百匹，不受。減五十匹，復不受。如是減半，遂至一匹，旣終不受。韓後與范同載，就車中裂二丈與范。云：「人寧可使婦無幘邪？」范笑而受之。

○晉范宣，字子宣，陳留人。漢萊蕪長范丹後也。○韓伯，字康伯，潁川人。官豫章太守。○裘衣，

貫兩脚，上繫腰中。

桓南郡○既破殷荊州，○收殷將佐十許人，咨議羅企生○亦在焉。桓素待企生厚，將有所戮，先遣人語云：「若謝我，當釋罪。」企生答曰：「爲殷荊州吏，今荊州奔亡，存亡未判，我何顏謝桓公。」既出市，桓又遣人問欲何言？答曰：「昔晉文王○殺嵇康，○而嵇紹○爲晉忠臣。從公乞一弟，○以養老母。」桓亦如言宥之。桓先曾以一羔裘與企生母胡，胡時在豫章，企生問至，卽日焚裘。

○晉桓玄，字敬道，譙國龍亢人。大司馬桓溫之少子，嗣父爲南郡公。○殷仲堪，陳郡人。太常

融之孫，官荊州刺史。○羅企生，字宗伯，豫章人。○晉司馬昭，字子上，嗣兄師，握魏政權，封晉

王，諡曰文王。○嵇康，字叔夜，譙國鉅人。拜中散大夫。○嵇紹，字延祖，嵇康之子，累遷散騎常

侍。○羅企生有弟，名遵生。

言語第二

邊文禮○見袁奉高，失次序。奉高曰：『昔堯聘許由，○面無忤色。先生何爲顛倒衣裳？』文禮答曰：『明府○初臨，堯德未彰，是以賤民顛倒衣裳耳。』

○漢邊讓，字文禮，陳留人。○許由，字武仲，陽城槐里人。上古高士。○太守，牧令，古皆稱府君，或稱明府君，簡稱明府。

徐孺子年九歲，嘗月下戲。人語之曰：『若令月中無物，當極明邪？』徐曰：『不然，譬如人眼中有瞳子，無此必不明。』

孔文舉○年十歲，隨父○到洛時。李元禮有盛名，爲司隸校尉。詣門者皆僞才清稱及中表親戚，乃通。文舉至門，謂吏曰：『我是李府君親。』既通，前坐。元禮問曰：『君與僕有何親？』對曰：『昔先君仲尼，與君先人伯陽○有師資之尊，是

僕與君奕世^④爲通好也。』元禮及賓客莫不奇之。太中大夫陳韙後至，人以其語語之。韙曰：『小時了了，大未必佳。』文舉曰：『想君小時，必當了了。』韙大踈踏^⑤。

○漢孔融，字文舉，魯國人。孔子二十四世孫。○融之父名宙，官泰山都尉。○李耳，字伯陽，諡

曰聃，周守藏室之史。○累世也。○不安之貌。

南郡○龐士元○聞司馬德操^⑥在潁川^⑦，故二千里候之。至，遇德操采桑。士元從車中謂曰：『吾聞丈夫處世，當帶金佩紫，焉有屈洪流之量而執絲婦之事？』德操曰：『子且下車，子適知邪徑之速，不慮失道之迷。昔伯成^⑧耦耕，不慕諸侯之榮。原憲^⑨桑樞，不易有官之宅。何有坐則華屋，行則肥馬，侍女數十，然後爲奇。此乃許父^⑩所以愜慨，夷齊^⑪所以長歎。雖有竊秦^⑫之爵，千駟之富，不足貴也。』士元曰：『僕生出邊垂，^⑬寡見大義。若不一叩洪鍾，^⑭伐雷鼓，^⑮則不識其音響也。』

○即今湖北之襄陽。○蜀 龐統，字士元，龐德公之從子，先主以爲治中從事，與諸葛亮並爲軍

師。○漢 司馬徽，字德操，有知人之鑒，龐德公稱爲水鏡。○即今河南之許昌。○禹爲天子，

伯成辭諸侯而耕於野。○原憲，字子思，宋人，孔子弟子。○上古高士許由巢父也。○殷 孤

竹君之子伯夷叔齊也。○秦 呂不韋以詐獲爵，故曰竊。○垂，遠邊也。○大鐘也。鍾鐘古通。

○樂器，古人祀天神用之，或云六面，或云八面。

劉公幹○以失敬○權罪，文帝○問曰：『卿何以不謹於文憲？』楨答曰：

『臣誠庸短，亦由陛下網目不疎。』

○魏 劉楨，字公幹，東平人。○楨隨侍太子，酒酣坐歡，乃使夫人甄氏出拜，坐上客多伏，楨獨平

視。○曹 丕，字子桓，曹操之長子，篡漢稱帝，諡曰文。○道之顯者曰文，懸法示人曰憲。

鍾毓，鍾會，○少有令譽，年十三，魏文帝聞之，語其父鍾繇○曰：『可令二子

來。』於是敕見，毓面有汗，帝曰：『卿面何以汗？』毓對曰：『戰戰惶惶，汗出如漿。』

復問會，『卿何以不汗？』對曰：『戰戰慄慄，汗不敢出。』

○毓字稚叔，仕至車騎將軍。會字士季，官至司徒。○繇字元常，潁川人。歷大理相國，遷太傅。

○司馬景王○東征。○取上黨○李喜，○以為從事中郎。因問喜曰：『昔先公

辟君不就，今孤召君何以來？』喜對曰：『先公以禮見待，故得以禮進退。明公以法見繩，喜畏法而至耳。』

○魏司馬師，字子元，司馬懿之長子。以撫軍大將軍輔政，自為相國。諡曰景王。○征毋丘儉也。

○郡名，其疆域甚廣。此指今山西之沁縣。○晉李喜，字季和。累遷光祿大夫。特進贈太保。

鄧艾○口喫，○語稱艾艾。晉文王戲之曰：『卿云艾艾，定是幾艾？』對曰：『鳳兮鳳兮，故是一鳳。』

○魏鄧艾，字士載，棘陽人。累遷征西將軍，平蜀，進位太尉。○言蹇難也。○見論語微子篇。

嵇中散既被誅。向子期○舉郡計○入洛，文王引進。問曰：『聞君有箕山○之志，何以在此？』對曰：『巢許猶介○之士，不足多慕。』王大咨嗟。

○潛向秀，字子期，河內人。官至散騎常侍。○郡國上計簿時，舉其才也。○在河南登封縣東。

南，堯時，巢父許由隱於此山。④有所不爲曰狷，堅確不拔曰介。

諸葛靚①在吳，於朝堂大會孫皓②。問「卿字仲思，爲何所思？」對曰：「在家思孝，事君思忠，朋友思信，如斯而已。」

①晉諸葛靚，琅邪人。司空諸葛誕之少子。②三國時吳之末主，孫權之孫，國亡降晉，封歸命侯。

諸名士共至洛水③戲，還，樂令④問王夷甫⑤曰：「今日戲樂乎？」王曰：「裴

僕射⑥善談名理，⑦混混⑧有雅致。張茂先⑨論史漢，⑩靡靡⑪可聽。我與王安

豐⑫說延陵⑬子房⑭，亦超超玄箸⑮。」

①源出陝西雒南縣西北冢嶺山，東流入河南。②卽樂廣。③晉王衍，字夷甫，琅邪人，司徒王

戎之從弟，仕至太尉。④裴頠，字逸民，聞喜人。司空裴秀之少子，歷侍中尚書左僕射。⑤猶今

之論理學。⑥原泉湧出之貌。⑦張華，字茂先，方城人。封廣武侯。⑧史記漢書也。⑨相隨

順之意。⑩卽王戎。⑪今江蘇武進縣，春秋時吳季札封於此，故稱季札爲延陵。⑫漢張良，

字子房，封留侯。⑬言論深妙也，著著古通。

中朝○有小兒父病，行乞藥。主人問病，曰：『患瘧也。』主人曰：『尊侯明德君子，何以病瘧？』答曰：『來病君子，所以爲瘧耳。』

○當時稱西晉朝廷所在地爲中朝。

崔正熊○詣都郡。○都郡將姓陳，問正熊：『君去崔杼○幾世？』答曰：『民去崔杼，如明府之去陳恆。』

○晉崔豹，字正熊，燕國人。惠帝時，官至太傅丞。○都，聚也。郡，羣也。人所羣聚之地也。○齊大

夫，弑齊莊公者。○齊大夫，弑齊簡公者。

庾公造周伯仁。○伯仁曰：『君何所欣說而忽肥？』庾曰：『君復何所憂慘而忽瘦？』伯仁曰：『吾無所憂。直是清虛日來，滓穢日去耳。』

○晉周顛，字伯仁，汝南人。揚州刺史周浚之長子，累遷尚書僕射。

衛洗馬○初欲渡江，形神慘頓。○語左右云：『見此茫茫，○不覺百端交集。苟未免有情，亦復誰能遣此。』

○晉衛玠，字叔寶，安邑人。官太子洗馬。○顧與碎通，變也。○廣大貌。

溫嶠○初爲劉琨○使，來過江。於時江左○營建始爾，○綱紀○未舉。溫新至，深有諸慮。既詣王丞相，○陳主上幽越，○社稷焚滅，山陵○夷毀之酷，有黍離○之痛。溫忠慨深烈，言與泗○俱，丞相亦與之對泣。敘情既畢，便深自陳結，丞相亦厚相酬納。既出，懽然言曰：『江左自有管夷吾，○此復何憂。』

○晉溫嶠，字太真，太原人。累遷驃騎大將軍。○劉琨，字越石，中山人。累遷司徒長史，尚書右丞。

封廣武侯。○即今江蘇之江寧。○爾，語助。○治絲者張之爲綱，理之爲紀。○王導，字茂

弘，王祥異母弟，王覽之孫，官至太傅。○幽，囚也。越，墜也。○天子塚也。○周大夫行役，至於

宗周，過故宗廟宮室，盡爲禾黍，閔周室之顛覆，傍徨不忍去。○鼻液曰泗。○齊大夫相桓公，

成鏽業。

郗太尉○拜司空。語同坐曰：『平生意不在多，值世故紛紜，遂至台鼎。○朱博○翰音，○實愧於懷。』

○晉祁鑒字道徽，高平人。○宰輔之稱，舊稱三公曰台鼎，言如星之有三台，鼎之有三足也。

○漢朱博字子元，杜陵人。為丞相，臨拜，延登受策，有大聲如鐘鳴。楊雄、李尋以為空名得進之兆。

○翰，高飛也，飛音者。音飛而實不從之謂也。

擊瞻○曾作四郡太守，大將軍戶曹參軍，復出作內史，年始二十九，嘗別王

敦，敦謂瞻曰：『卿年未三十，已為萬石，亦太蚤。』瞻曰：『方於將軍，少為太

蚤，比之甘羅，已為太老。』

○晉擊瞻字景游，京兆人。太常擊虞之兄子也。○王敦字處仲，丞相王導之從兄，官鎮東大將

軍。○言瞻居官之俸已萬石也。○秦相甘茂之孫，年十二，秦封為上卿。

謝仁祖○年八歲，謝豫章將送客，爾時語已神悟，自參上流。○諸人咸

共歎之，曰：『年少一坐之顏回。』仁祖曰：『坐無尼父，焉別顏回。』

○晉謝尚字仁祖，陳郡人。仕至鎮西將軍，豫州刺史。○謝鯤字幼輿，謝尚之父，為豫章太守，贈

太常。○逄頴也。○參，間廁也，自居於上等名流也。○顏回，字子淵，魯人。孔子弟子。○魯

哀公誅孔子，稱爲尼父。

孫齊由齊莊。二人小時詣庚公。公問：「齊由何字？」答曰：「字齊由。」公曰：「欲何齊？」曰：「齊許由。」「齊莊何字？」答曰：「字齊莊。」公曰：「欲何齊？」曰：「齊莊周。」公曰：「何不慕仲尼？」而慕莊周？」對曰：「聖人生知，故難企慕。」庚公大喜，小兒對。

○晉孫潛，字齊由，太原人。孫放，字齊莊，孫潛之弟。○莊周，戰國蒙人。楚莊王聞其賢，迎以爲相。

辭不就。○孔子之母孺於尼山生孔子，故字仲尼。

庾穉恭。○爲荊州。○以毛扇上武帝。○武帝疑是故物。侍中劉邵曰：「柏梁雲構，工匠先居其下。管弦繁奏，鍾夔先聽其音。穉恭上扇，以好不以新。」庾後聞之曰：「此人宜在帝左右。」

○晉庾翼，字穉恭，太傅庾亮之弟，官至征南將軍，荊州刺史。○今湖北省之襄陽，卽晉時之荊州。

○武帝姓司馬，名炎，司馬懿之孫。○劉邵，字彥祖，彭城人，官至豫章太守。○臺名，漢武

帝所築臺以柏爲梁，故名柏梁臺。⑤樂一更端曰奏。⑥鍾子期，春秋時楚人，古之知音者。

⑦舜典樂之官。

顧悅○與簡文○同年而髮蚤白。簡文曰：『卿何以先白？』對曰：『蒲柳之姿，望秋而落。松柏之質，經霜彌茂。』

○晉顧悅，字君叔，晉陵人。初爲揚州別駕，後至尚書左丞。○簡文帝，名昱，字道萬，在位二年。

桓公○入峽。○絕壁天懸，騰波迅急。迺歎曰：『旣爲忠臣，不得爲孝子，如何？』

○晉桓溫，字元子，譙國人。漢五更桓榮之後，累遷琅邪內史，進征西大將軍，謚宣武侯。○山嶺

夾水曰峽，川楚間大江中有三峽，舟行甚險。

羊秉○爲撫軍參軍。少亡，有令譽。夏侯孝若○爲之敘，極相讚悼。羊權○爲

黃門侍郎，侍簡文坐。帝問曰：『夏侯湛作羊秉敘，絕可想！是卿何物？』有後不⑤

權潛然⑥對曰：『亡伯令問夙彰，而無有繼嗣。雖名播天聽，然胤絕聖世！』帝

嗟慨久之！

○晉羊秉，字長達，平陽人。漢南陽太守羊續之曾孫。○夏侯湛，字孝若，譙國人。魏征西將軍夏侯淵之曾孫，歷中書侍郎。○羊權，字道與，徐州刺史羊悅之子，仕至尚書左丞。○阮籍，目王戎爲俗物，溫嶠稱桓溫爲英物，可見晉時常以物字作人字用。○不，音浮，未定之辭也。○滯流貌。○子孫相承續也。

劉真長○爲丹陽○尹許玄度○出都，就劉宿。牀帷新麗，飲食豐甘。許曰：「若保全此處，殊勝東山。」○劉曰：「卿若知吉凶由人，吾安得不保此。」王逸少○在坐，曰：「令巢許遇稷○契○當無此言。」二人並有愧色。

○晉劉惔，字真長，沛國人。歷司徒左長史、侍中、丹陽尹。○今安徽之當塗縣。○許詢，字玄度，高陽人。魏中領軍許允之玄孫。○在今浙江上虞縣西南四十五里，晉謝安所居。○王羲之，字逸少，琅琊人。累遷江州刺史、右軍將軍、會稽內史。○姜嫫，踐巨人跡而生子，以爲不祥。初欲棄之，因名棄。虞舜時棄爲后稷，因稱棄爲后稷。○虞舜時爲司徒，商之祖也。

王右軍與謝太傅共登冶城。○謝悠然遠想，有高世之志。王謂謝曰：「夏

禹○勤王，手足胼胝。○文王○盱○食，日不暇給。今四郊多壘，宜人人自效。而虛談廢務，浮文妨要，恐非當今所宜。謝答曰：「秦任商鞅，○二世而亡，豈清言致患邪？」

○在今江蘇省城內，吳時鼓鑄之所，朝天宮即其舊址。○初封夏伯，後受舜禪為王。○手足皆生繭也。○殷之諸侯，周武王之父，諡曰文，追尊為王。○晚也。○鞅，衛諸庶孽子，為秦孝公相，封於商。

謝太傅寒雪日內集，與兒女講論文義，俄而雪驟。○公欣然曰：「白雪紛紛何所似？」兄子胡兒曰：「撒○鹽空中差可擬。」兄女曰：「未若柳絮因風起。」公大笑樂。即公大兄無奕女，左將軍王凝之○妻也。

○驟，迅捷也。○謝朗，字長度，小字胡兒，安次兄據之長子，仕至東陽太守。○撒音薩，散之也。○王凝之，字叔平，右將軍羲之之第二子，歷江州刺史，左將軍會稽內史。

荀中郎○在京口○登北固○望海云：「雖未覩三山，○便自使人有凌雲。」

意。若秦漢之君，^①必當褰裳濡足。」

○晉荀羨，字全則，潁川人。光祿大夫荀崧之子，爲駙馬都尉，超授北中郎將，徐州刺史。○今江

蘇丹徒縣治，以京峴山得名。一說，謂京江之口也。○北固山在江蘇丹徒縣城北，下臨長江，其

勢險固。○蓬萊方丈瀛洲三山，世傳在海中。嘗有至者，言諸仙人不死藥在焉。○秦始皇興

漢武帝也。

晉武帝每餉○山濤○恆少，謝太傅以問子弟，車騎○答曰：「當由欲者不
多，而使與者忘少。」

○贈人以物曰餉。○山濤，字巨源，河內人。武帝受禪，濤領吏部十餘年。○謝玄，字幼度，謝安

之姪，官至前將軍，封康樂縣公。

李弘度○常歎不被遇，殷揚州○知其家貧，問：「君能屈志百里○不？」李
答曰：「北門○之歎，久已上聞。窮猿奔林，豈暇擇木。」遂授剡縣。

○晉李充，字弘度，江夏人。官至大著作中書郎。○殷浩，字淵源，長平人。仕至揚州刺史，中軍將

軍。○蜀龐統為耒陽令，魯肅稱龐士元非百里才。○詩經篇名，刺仕不得志也。

孝武○將講孝經，○謝公兄弟○與諸人私庭講習。車武子○難苦問謝，謂

袁羊○曰：『不問則德音有遺，多問則重勞二謝。』袁曰：『必無此嫌。』車曰：『何以知爾？』袁曰：『何嘗見明鏡疲於屢照，清流憚於惠風。』

○晉孝武帝，名曜，字昌明，簡文帝之第三子。在位二十四年。○孔子為曾子陳孝道而作十三

經之一經也。○謝安與謝石也。○車胤，字武子，南平人。累遷丹陽尹，護軍將軍，吏部尚書。

○袁喬，字彥升，小字羊，陳郡人。歷尚書郎，江夏相，封湘西伯，益州刺史。

張天錫○為涼州○刺史，稱制○西隅。既為苻堅○所禽，用為侍中。後於壽

陽○俱敗至都，為孝武所器。每入言論，無不竟日。頗有嫉己者，於坐問張『北方何物可貴？』張曰：『桑椹○甘香，鷓鴣○革響。淳○酪○養性，人無嫉心。』

○晉張天錫，字公純，安定人。嘗自立為涼州牧，後歸晉，拜散騎常侍，西平公，贈侍中。○今甘

肅省。涼者，地處西方，常寒涼也。○天子之言曰制書，謂為制度之命也。○晉時前秦之主，為

五胡之最强盛者。⑤原名壽春。東晉以鄭后諱改爲壽陽，卽今安徽壽縣。⑥樞，音甚，桑實也。

⑦鷺鳥也。⑧不澆曰淳。⑨北方以馬乳爲酪。

毛伯成○既負其才氣，常稱：『寧爲蘭摧玉折，不作蕭敷艾榮。』

○晉毛玄，字伯成，潁川人。仕至征西行軍參軍。

司馬太傅○齋中夜坐。於時天月明淨，都無纖翳。太傅歎以爲佳。謝景重○在坐答曰：『意謂乃不如微雲點綴。』太傅因戲謝曰：『卿居心不淨，乃復強欲滓穢太清邪？』

○晉司馬道子，簡文帝之第五子，封會稽王，領司徒，揚州刺史，進太傅，贈丞相。○謝重，字景重，

陳郡人。官至驃騎長史。○元氣之清者也。

桓玄義興○還後，見司馬太傅，太傅已醉，坐上多客，問人云：『桓溫來欲作賊○如何？』桓玄伏不得起。謝景重時爲長史，舉板○答曰：『故宣武公黜昏暗，登聖明，功超伊○霍。○紛紜之議，裁之聖鑒。』太傅曰：『我知我知。』卽舉酒云：

「桓義與勸卿酒。」桓出，謝過。

○晉郡名。卽今江蘇之宜興。桓玄嘗爲義興太守。○從下制上謂之賊。○板，與版通，笏也。

④商伊尹，名摯，湯之賢相，湯之孫太甲無道，尹放之於桐宮，三年，太甲悔過，復歸於亳。⑤漢霍光，字子孟，平陽人。光以大司馬大將軍輔政，廢昌邑王，立宣帝，封博陸侯。

政事第三

陳元方年十一時，候袁公。○袁公問曰：「賢家君在太丘，○遠近稱之。何所履行？」元方曰：「老父在太丘，彊者綏之以德，弱者撫之以仁，恣其所安，久而益敬。」袁公曰：「孤往者嘗爲鄴令，正行此事。不知卿家君法孤，孤法卿父？」元方曰：「周公孔子，異世而出。周旋動靜，萬里如一。周公不師孔子，孔子亦不師周公。」

○原注云：「檢衆漢書，袁氏諸公，未知誰爲鄴令。」○漢縣名，故城在今河南永城縣西北。

○在今河南臨漳縣境。

稽康被誅後，山公○舉康子紹爲祕書丞。紹咨公出處，公曰：「爲君思之久矣，天地四時，猶有消息。○而況人乎？」

○山濤領吏部，甄拔人物，各爲題目，時稱山公啓事。

○消謂滅，息謂增。

王安期○作東海郡，○吏錄一犯夜人來，王問「何處來？」云：「從師家受

書還，不覺日晚。」王曰：「鞭撻甯越。」以立威名，恐非治理之本。」使吏送令歸家。

○晉王承，字安期，太原人。累遷東海內史。○即今江蘇東海縣山東沂水縣地。

○甯越，中牟人。學十五歲而爲齊之上卿。

成帝○在石頭，○任讓○在帝前，戮侍中鍾雅。○右衛將軍劉超，○帝泣曰：

「還我侍中。」讓不奉詔，遂斬超。雅事平之後，陶公○與讓有舊，欲宥之。許柳○

兒思妣○者，至佳，諸公欲全之。若全思妣，則不得不爲陶全讓，於是欲并宥之，事

奏。帝曰：「讓是殺我侍中者，不可宥。」諸公以少主不可違，并斬二人。

○晉成帝，名衍，字世根，明帝之太子，在位十七年，年二十二崩。○城名，成帝咸和三年，蘇峻逼

遷帝於石頭。在今江蘇江寧縣西石頭山後。○任讓，樂安人。隨蘇峻作亂。○鍾雅，字彥胃，潁

川人，魏太傅鍾繇之弟仲常之曾孫，累遷至侍中。④劉超，字世瑜，琅琊人。漢成陽景王六世孫。

封零陽伯，遷右衛大將軍。⑤陶侃，字士行，其先鄱陽人。後徙潯陽。累遷湘廣荆三州刺史，封長

沙郡公，大將軍，進太尉，贈大司馬，諡桓公。⑥許柳，字季祖，高陽人。蘇峻用爲丹陽尹。⑦許永，

字思妣。

陸太尉①詣王丞相②咨事，過後輒翻異。王公怪其如此，後以問陸。陸曰：

『公長民短，臨時不知所言，既後覺其不可耳。』

①晉陸玩，字士瑤，吳郡人。累遷侍中，尚書左僕射，尚書令，贈太尉。②王導，字茂弘，琅琊人。晉之

中興，導功爲多，官至太傅。

王①劉②與林公③共看何驃騎④，驃騎看文書不顧之。王謂何曰：『我今

故與林公來相看，望卿擺撥常務，應對玄言。那得方低頭看此邪？』何曰：『我不

看此，卿等何以得存。』諸人以爲佳。

①晉王濛，字仲祖，太原人。辟司徒掾中書郎，贈光祿大夫。②卽丹陽尹劉惔。③支遁，字道林，

河內人，或曰陳留人。本姓關氏，年二十五爲僧。

④何充，字次道，廬江人。舉遷會稽內史，侍中，驃

騎將軍，揚州刺史，贈司徒。

桓公在荊州，全欲以德被江漢，恥以威刑肅物。令史受杖，正從朱衣上過。

桓式年少，從外來，云：『向從閣下過，見令史受杖，上捎雲眼，下拂地足。』意譏

不著。桓公云：『我猶患其重。』

○即今湖北之襄陽，桓溫於晉穆帝永和元年遷荊州刺史。

○桓歆，字叔道，小字式，溫之第三

子，仕至尚書。

簡文爲相，事動經年，然後得過。桓公甚患其遲，常加勸勉。太宗曰：『一日

萬機，那得速。』

○晉簡文帝廟號太宗。

○言當戒懼萬事之微。

王大爲吏部郎，嘗作選草，臨當奏，王僧彌來，聊出示之。僧彌得便以己

意改易所選者近半，王大甚以爲佳，更寫即奏。

○晉王忱，字元達，小字佛大，太原人。仕至荊州刺史。○王珉，字季琰，小字僧彌，丞相王導之孫，累遷侍中，中書令，贈太常。

王東亭○與張冠軍○善，王既作吳郡，○人問小令○曰：「東亭作郡，風政何似？」答曰：「不知治化何如，惟與張祖希情好日隆耳。」

○晉王珣，字元琳，丞相王導之孫，封交趾望海縣東亭侯，累遷尚書左僕射，領選，進尚書令。○

張玄，字祖希，吳郡太守張澄之孫也。歷吏部尚書，出爲冠軍將軍，吳興太守。○卽今江蘇之蘇州。○王獻之爲中書令，王珉代之，時人曰：「大小王令。」

殷仲堪當之荊州，王東亭問曰：「德以居全爲稱，仁以不害物爲名。方今宰牧華夏，處殺戮之職，與本操將不乖乎？」殷答曰：「臯陶○造刑辟○之制，不爲不賢。孔丘居司寇○之任，未爲不仁。」

○虞舜時爲獄官之長。○辟，法也。○孔子爲魯司寇七日，而誅亂法大夫少正卯。

文學 第四

鄭玄○欲注春秋傳，○尙未成。時行與服子慎○遇，宿客舍，先未相識。服在外車上，與人說已注傳意。玄聽之良久，多與己同。玄就車與語曰：「吾久欲注，尙未了。聽君向言，多與吾同，今當盡以所注與君。」遂爲服氏注。

○漢鄭玄，字康成，高密人。獻帝徵爲大司農。○即春秋左傳十三經之一經也。○服虔，字子

慎，滎陽人。著春秋左氏傳訓解，舉孝廉，爲尙書郎，九江太守。

鄭玄家奴婢皆讀書。嘗使一婢不稱旨，將撻之，方自陳說，玄怒，使人曳箠泥中，須臾復有一婢來，問曰：「胡爲乎泥中？」答曰：「薄言往愬，逢彼之怒。」

○此邶風式微章之詩也。泥中本爲衛邑，借用泥爲水和土之泥。○此邶風柏舟章之詩也。薄

言，有以爲皆語辭者，亦有以薄爲勉，言爲我者。愬與訴同。

服虔既善春秋，○將爲注，欲參考同異。聞崔烈○集門生講傳，遂匿姓名，爲烈門人，實作食。每當至講時，輒竊聽戶壁間。既知不能踰己，稍共諸生敍其短長。烈聞，不測何人。然素聞虔名，意疑之。明蚤往，及未寤，○便呼子慎子慎。虔不覺驚應，遂相與友善。

○本魯史記之名，孔子刪定之。自魯隱公元年至魯哀公十四年，凡十二公，二百四十二年，編年之史也。○漢崔烈，字威考，安平人。靈帝時，官至司徒、太尉，封陽平亭侯。○寤，覺也。

鍾會撰四本○論，始畢，甚欲使嵇公○一見，置懷中，既定，畏其難，○懷不敢出。於戶外遙擲，便回急走。

○四本者，言才性同，才性異，才性合，才性離也。○卽嵇康。○詰辨也。

何晏○爲吏部尙書。有位望，時談客盈坐。王弼○未弱冠，○往見之。晏聞弼名，因條向者勝理，語弼曰：「此理僕以爲極，可得復難不？」弼便作難，一坐人便以爲屈。於是弼自爲客主數番，皆一坐所不及。

○魏何晏，字平叔，南陽人。正始中，曹爽用爲中書，累官侍中尚書，爵列侯。○王弼，字輔嗣，山陽人。注易及老子，年二十四而卒。○年二十成人，初加冠，體猶未壯，故曰弱，未弱冠，年未二十也。

何晏注老子○未畢，見王弼自說注老子旨。何意多所短，不復得作聲，但應諾諾，遂不復注，因作道德論。

○老聃所撰，分上下篇，言道德之意五千餘言。今所傳本有漢河上公注與魏王弼注二家。

中朝時○有懷道之流，有詣王夷甫咨疑者。值王昨已語多，小極，○不復相酬答。乃謂客曰：『身今少惡，○裴逸民○亦近在此，君可往問。』

○東晉偏安於江左，故西晉時有中朝時之稱。○書六極，二曰疾。小極，小病也。○惡，疾病也。

○即僕射裴頠。

諸葛玄○年少不肯學問。始與王夷甫談，便已超詣。王歎曰：『卿天才卓出，若復小加研尋，一無所愧。』玄後看莊○老，更與王語，便足相抗衡。○

○晉諸葛玄，字茂遠，琅邪人。魏雍州刺史諸葛緒之子，仕至司空主簿。○周莊周所著之書，名

曰莊子，都十餘萬言。唐天寶元年，詔號爲南華真經。

○抗，對也。衡，車輓上橫木。抗衡，言兩衡相對，不相避下也。

對抗，不相避下也。

衛玠總角時，問樂令夢。樂云：『是想。』衛曰：『形神所不接而夢，豈是想邪？』樂云：『因也。未嘗夢乘車入鼠穴，擣礮。』○噉，鐵杵，皆無想無因故也。『衛思因經日不得，遂成病。樂聞，故命駕爲剖析之。』衛即小差。○樂歎曰：『此兒胸中，當必無膏言之疾。』

○男女未冠笄者之稱，謂總聚其髮而結束之也。○擣，幸物爲礮也。○噉，與噉同。○差，斂

去聲，病除也。○心下爲膏。○高也。高與胸膈之膈通，管上下使氣與穀不相亂也。

初注莊子者數十家，莫能究其旨要。向秀於舊注外爲解義，妙析奇致，大暢玄風。惟秋水至樂二篇，未竟而秀卒。秀子幼，義遂零落，然猶有別本。郭象者，爲人薄行，有雋才。見秀義不傳於世，遂竊以爲己注。乃自注秋水至樂二篇，又易馬蹄一篇。其餘衆篇，或定點文句而已。後秀義別本出，故今有向郭二莊，其義一也。

○晉郭象，字子玄，河南人。辟司空掾，太傅主簿。

阮宣子○有令聞。○太尉王夷甫見而問曰：『老莊與聖教同異？』對曰：『將無同。』太尉善其言，辟之爲掾。世謂『三語掾』。衛玠嘲之曰：『一言可辟，何假於三。』宣子曰：『苟是天下人望，亦可無言而辟，復何假一。』遂相與爲友。

○晉阮脩，字宣子，陳留人，嘗爲鴻臚丞，太子洗馬。○令聞，善譽也。○將，幾及之詞。

謝安年少時，請阮光祿道白馬論。○爲論以示謝，於時謝不卽解阮語，重相咨盡。阮乃歎曰：『非但能言人不可得，正索解人亦不得。』

○趙人公孫龍云：『白馬非馬。』

宣武集諸名勝○講易，日說一卦。簡文欲聽，聞此便還。曰：『義自當有難易，其以一卦爲限邪？』

○有名之勝地也。

莊子逍遙篇，舊是難處，諸名賢所可鑽味，而不能拔理於郭向之外。支道林

在白馬寺○中，將馮太常○共語，因及逍遙。支卓然標新理於二家之表，立異義於衆賢之外，皆是諸名賢尋味之所不得。後遂用支理。

○白馬寺在河南洛陽縣東，故洛陽城西，此爲僧寺之最古者。○晉馮懷，字祖思，長樂人。歷太

常護國將軍。

許掾○年少時，人以比王荀子。○許大不平。時諸人士及於法師，並在會稽西○寺講，王亦在焉。許意甚忿，便往西寺與王論理。共決優劣，苦相折挫，王遂大屈。許復執王理，王執許理，更相覆疏。○王復屈。許謂支法師曰：「弟子向語何似？」支從容曰：「君語佳則佳矣，何至相苦邪？豈是求理中之談哉。」

○卽許詢，辟司徒掾，故稱許掾。○王脩，字敬仁，小字荀子，光祿王濛之子，起家著作佐郎，琅邪

王文學，轉中軍司馬。○山名，在浙江紹興縣東南十二里。○疏通其義謂之疏。

林道人○詣謝公。東陽○時始總角，新病起，體未堪勞，與林公講論，遂至相苦。母王夫人○在壁後聽之，再遣信令還，而太傅留之。王夫人因自出云：「新婦

少遭家難，一生所寄，惟在此兒。」因流涕抱兒以歸。謝公語同坐曰：「家嫡辭情
恍惚，致可傳述，恨不使朝士見！」

○即支遁。○即謝朗。○太康王韜之女，名綏。

支道林許掾諸人，共在會稽王○齋頭。○支爲法師，許爲都講。○支通一義，
四坐莫不厭心。許送一難，衆人莫不抃舞。但共嗟詠二家之美，不辨其理之所
在。

○即簡文帝。○蔬食曰齋。晉時有以頭作筵解者。○都講，講師也。○厭與壓通，飽足也。

支道林初從東出，○住東安寺中。王長史○宿構精理，并撰其才藻，○往與
支語，不大當對。王敘致作數百語，自謂：「是名理奇藻。」支徐徐謂曰：「身與君
別多年，君義言了不長進。」王大慚而退。

○支遁居會稽，晉哀帝遣中使至東迎之。○即王濛。○藻，水草之有文者以喻文焉。

殷中軍○讀小品，○下二百籤，皆是精微。世之幽滯，嘗欲與支道林辯之，竟

不得。今小品猶存。

○即殷浩。○辨空經之略者爲小品。

于法開○始與支公爭名。後精漸歸支，意甚不分。○遂遁跡剡下。○遣弟子出都語，○使過會稽，於時支公正講小品，開戒○弟子道林講比○汝至，當在某品中。

○于法開才辯縱橫，以數術弘教。居剡縣，更學醫術。○不分，不甘慊也。○剡山之下。○語，

爲人論說也。○戒，告也。○比，及也。

因示語攻難數十番，云：『舊此中不可復通。』弟子如言詣支公，正值講。因謹述開意，往反多時，林公遂屈。厲聲曰：『君何足復受人寄○載○來。』

○寄，以物付人由此達彼也。○載，舟車運物也。

殷謝○諸人共集。謝因問殷，『眼往屬萬形，萬形來入眼不？』

○殷浩，謝安也。

人有問殷中軍，「何以將得位而夢棺器，將得財而夢矢穢？」殷曰：「官本是臭腐，所以將得而夢棺屍。財本是糞土，所以將得而夢穢汗。」時人以爲名通。張憑○舉孝廉，出都，負其才氣，謂必參○時彥。欲詣劉尹，○鄉里及同舉者共笑之。張遂詣劉，劉洗濯料事，處之下坐。惟通寒暑，神意不接。張欲自發無端，頃之，長史○諸賢來清言。客主有不通處，張乃遙於末坐判之。言約旨遠，足暢彼我之懷。一坐皆驚，真長延之上坐。清言彌日，因留宿至曉。張退，劉曰：「卿且去，正當取卿共詣撫軍。」○張還船，同侶問何處宿，張笑而不答。須臾，真長遣傳教○覓張孝廉船，同侶惋愕。即同載詣撫軍，至門，劉前進，謂撫軍曰：「下官今日爲公得一太常博士妙選。」既前，撫軍與之話言，咨嗟稱善。曰：「張憑勃率○爲理窟。」即用爲太常博士。

○晉張憑，字長宗，吳郡人。累遷吏部郎，御史中丞。○參，開廁也。○即劉惔。○即王濛。○

即簡文帝。○遣傳命令之人也。○勃率，匆匆行也。

僧意○在瓦官寺中。王荀子來與共語，便使其唱理。意謂王曰：『聖人有情不？』王曰：『無。』重問曰：『聖人如柱邪？』王曰：『如籌算。雖無情，運之者有情。』僧意云：『誰運聖人邪？』荀子不得答而去。

○原注未詳僧意氏族所出。

司馬太傅問謝車騎○『惠子○其書五車，何以無一言入玄？』謝曰：『故當是其妙處不傳。』

○即謝玄。○惠施，戰國時人，莊子之友。

殷荊州曾問遠公○『易以何爲體？』答曰：『易以感爲體。』殷曰：『銅山西崩，靈鐘東應，便是易邪？』遠公笑而不答。

○惠遠，廬山人，本姓賈氏。

殷仲堪云：『三日不讀道德經，○便覺舌本間強。○』

○即老子。○強，讀去聲，不和柔也。

文帝○嘗令東阿王○七步中作詩，不成者行大法。應聲便為詩曰：『煮豆持作羹。漉○漉○以爲汁。其在釜下燃。豆在釜中泣。本自同根生。相煎何太急。』帝深有慚色。

○曹丕，字子桓，曹操之長子，篡漢，即皇帝位，諡曰文帝。○曹植，字子建，曹丕之弟，封東阿王。○漉，音祿，滲也，水因阻隔而徐徐下滲也。○漉，俗從豆作豉，配鹽幽也。

左太沖○作三都○賦初成，時人互有譏訾，思意不愜。後示張公，○張曰：『此二京○可三。然君文未重於世，宜以經高名之士。』思乃詢求於皇甫謐，○謐見之嗟歎，遂爲作敘。於是先相非貳者，莫不斂衽○讚述焉。

○晉左思，字太沖，齊國人。徵爲祕書。○三都者，劉備都益州號蜀，孫權都建業號吳，曹操都鄴號魏。○即張華。○漢張衡，字平子，西鄂人。擬班固兩都，作二京賦。○皇甫謐，字士安，朝歌人。徵辟皆不就，隱居終身。○斂其衣襟，表示肅敬也。

孫子荆○除婦服，作詩以示王武子。○王曰：『未知文生於情，情生於文？』

之悽然，增伉儷之重。」

○晉孫楚，字子荆，太原人。○王濟，字武子，太原人。起家中書郎，終太僕。○伉儷者，言是相敵

之匹偶也。

太叔廣○甚辯給，○而擊仲治○長於翰墨，俱爲列卿。○每至公坐，廣談，仲

治不能對。退著筆難廣，廣又不能答。

○晉太叔廣，字季思，東平人。○有口才也。○擊處，字仲治，長安人，師事皇甫謐，歷祕書監，太

常卿。○謂諸卿之列也。

庾子嵩○作意賦○成，從子文康○見問曰：「若有意邪？非賦之所盡。若無

意邪？復何所賦？」答曰：「正在有意無意之間。」

○晉庾敳，字子嵩，潁川人。侍中庾峻之第三子，仕至豫州長史。○敳見王室多難，知終撰其禍，

作意賦以寄懷。○庾亮諡文康。

習鑿齒○史才不常，宣武甚器之。未三十，便用爲荊州治中。鑿齒謝牋亦云：

『不遇明公，荊州老從事耳。』後至都，見簡文，返命宣武，問：『見相王何如？』答云：『一生不曾見此人。』從此忤旨，出爲衡陽郡。性理遂錯。於病中猶作

漢晉春秋，品評卓逸。

○晉習鑿齒，字彥威，襄陽人。○佐吏也。○卽簡文帝。○左遷衡陽太守。○因抑鬱而精

神衰弱也。○起漢光武，終於晉愍帝，凡五十四卷。是時桓溫覬覦非望，鑿齒著此書以裁正之。

謝太傅問主簿陸退：『張憑何以作母誄，而不作父誄？』退答曰：『故

當是丈夫之德，表於事行。婦人之美，非誄不顯。』

○晉陸退，字黎民，吳郡人。張憑之壻，仕至光祿大夫。○誄者，哀死而述其行之辭也。

孫興公云：『潘文爛若披錦，無處不善。陸文若排沙簡金，往往見寶。』

○晉孫綽，字興公，太原人。仕至散騎常侍。○潘岳，字安仁，滎陽人。仕至黃門侍郎。○陸機，字

士衡，吳郡人。吳丞相陸遜之孫，與弟雲齊名。

桓公見謝安石作簡文證議，看竟，擲與坐上諸客曰：『此是安石碎金。』

○卽桓溫。

○言善爲文者，其緒餘亦可珍貴也。

方正第五

陳太丘與友期行，期日中。過中不至，太丘舍去。去後乃至，元方時年七歲，門外戲。客問元方：『尊君在不？』答曰：『待君久不至，已去。』友人便怒曰：『非人哉！與人期行，相委而去。』元方曰：『君與家君期日中，日中不至，則是無信；對子罵父，則是無禮。』友人慙，下車引之，元方入門不顧。

○相牽曰引。

郭淮○作關中○都督，甚得民情，亦屢有戰庸。淮妻，太尉王凌○之妹，坐凌事○當并誅。使者徵○攝○甚急，淮使戒○裝，剋日○當發。州府文武及百姓勸淮舉兵，淮不許。至期遣妻，百姓號泣追呼者數萬人，行數十里。淮乃命左右追夫人還，於是文武奔馳，如徇身首之急。既至，淮與宣帝○書曰：『五子哀戀，思念

其母。其母既亡，則無五子。五子若殞，亦復無淮。」宣帝乃表①特原淮妻。

①魏郭淮，字伯濟，陽曲人。在關中三十餘年，遷儀同三司，贈大將軍。②即今陝西省，東自函關，

西至隴關，二關之間，謂之關中。③庸，功也。④王凌，字彥雲，太原人。歷司空，太尉，征東將軍。

⑤凌欲立楚王彪，司馬宣王自討之，凌自縛歸罪。⑥徵，召也。⑦攝，捕也。⑧戒，備也。⑨嚴

限日期也。⑩司馬懿，字仲達，溫縣人，孫炎代魏，追尊為宣帝。⑪下言於上曰表。

諸葛亮○之次○渭濱，○關中震○動。○魏明帝○深懼晉宣王戰，乃遣辛

毗○為軍司馬。宣王既與亮對渭而陳，○亮設誘譎萬方。宣王果大怒，將欲應之

以重兵。亮遣間諜覘之，還曰：『有一老夫，毅然仗黃鉞，當軍門立，軍不得出。』亮

曰：『此必辛佐治也。』

○蜀諸葛亮，字孔明，陽都人。累遷丞相益州牧，封武鄉侯，謚忠武。①凡師一宿為舍，再宿為信，

過信為次。②在今陝西之郿縣武功縣境。③震，懼也。④不安也。⑤曹叡，字元仲，繼文帝

為魏帝，在位十三年。⑥辛毗，字佐治，陽翟人。累遷衛尉。⑦陳為陣之本字。

高貴鄉公○薨，內外諠譁。司馬文王問侍中陳泰○曰：「何以靜之？」泰云：「惟殺賈充○以謝天下。」文王曰：「可復下此不？」對曰：「但見其上，未見其下。」

○曹髦，字彥士，魏文帝之孫，東海定王曹霖之子，初封鄴縣高貴鄉公。司馬師廢廢帝，立髦為帝，在位七年，司馬昭之黨賈充嗾成濟弑之。

○陳泰，字玄伯，司空陳羣之子。

○賈充，字公闕，漢

賈逵之子。

諸葛靚後入晉○除○大司馬，召不起。以與晉室有讎，○常背洛水而坐。與武帝○有舊，帝欲見之而無由，乃請諸葛妃○呼靚，既來，帝就太妃間相見。禮畢，酒酣，帝曰：「卿故復憶竹馬之好不？」靚曰：「臣不能吞炭漆身，○今日復覩聖顏。」因涕泗百行，帝於是慙悔而出。

○靚仕於吳為右將軍大司馬，吳亡入洛。

○拜官曰除，除去舊官就新官也。

○靚父誕為晉

太祖司馬昭所殺。

○司馬炎，字安世，司馬昭之長子。篡魏稱帝，在位二十五年，諡曰武帝。

○

武帝叔母琅邪王妃，觀之姊也。②戰國時，豫讓欲弑趙襄子，爲智伯報讎，吞炭爲啞，漆身爲厲。

晉武帝時，荀勗爲中書監，和嶠爲令。故事監令由來共車，嶠性雅正，常疾勗諂諛。後公車來，嶠便登正向前坐，不復容勗。勗方更覓車，然後得去。監令各給車自此始。

○荀勗，字公曾，潁川人。漢司空荀爽之曾孫，爲安陽令，累遷侍中，中書監。○和嶠，字長輿，汝南人。歷尚書，太子少傅。○公車，官車也。○給，備也。

齊王冏爲大司馬，輔政。嵇紹爲侍中，詣冏咨事。冏設宰會，召葛旗、董艾等，共論時宜。旗等白冏：「嵇侍中善於絲竹，公可令操之。」遂送樂器，紹推卻不受。冏曰：「今日共爲歡，卿何卻邪？」紹曰：「公協輔皇室，令作事可法，紹雖官卑，職備常伯。操絲比竹，蓋樂官之事。不可以先王法服爲伶人之業。今逼高命，不敢苟辭。當釋冠冕，襲私服，此紹之心也。」旗等不自得而退。

○司馬冏，字景治，晉宗室獻王攸之子。○宰者，官也。○葛旗，字虛旗，齊王官屬。○董艾，字

叔智，弘農人。齊王起義，艾領右將軍。④黃帝時，風后爲侍中，於周爲常伯之任。⑤黃帝時，伶

倫造音樂，故後世稱善音樂歌曲者爲伶人。⑥襲服也。

盧志○於衆坐問陸士衡，『陸遜陸抗，○是君何物？』答曰：『如卿於盧毓

盧璉。』士龍○失色，既出戶，謂兄曰：『何至如此？彼容不相知也。』士衡正色

曰：『我父祖名播海內，寧有不知，鬼子○敢爾。』議者疑二陸優劣，謝公以此定

之。

○晉盧志，字子通，起家鄴令，歷成都王長史，衛尉卿，尚書郎。○機之祖遜爲吳丞相，父抗爲吳

大司馬。○志之祖毓，字子家，爲魏司空。父璉，字子笏，魏元帝末年爲泰山太守。○陸雲，字士

龍，大司馬抗之第五子，機同母之弟，累遷太子舍人，清河內史。○漢盧充與鬼爲婚生子，志卽

充之後裔。

王太尉○不與庾子嵩交，庾卿之○不置。王曰：『君不得爲爾。』庾曰：『卿

自君我，我自卿卿。我自用我法，卿自用卿法。』

○即王衍。○敵體相呼爲卿，蓋貴之也。

阮宣子○論鬼神有無者，或以人死有鬼，宣子獨以爲無。曰：「今見鬼者云：『著生時衣服』，若人死有鬼，衣服復有鬼邪？」

○即阮脩。

元皇帝○既登阼，○以鄭后○之寵，欲舍明帝○而立簡文。時議者咸謂「舍長立少，既於理非倫。」且明帝以聰亮英斷，益宜爲儲副。」周王○諸公，並苦爭懇切。惟刁玄亮○獨欲奉少主以阿帝旨。元帝便欲施行，慮諸公不奉詔。於是先喚周侯丞相○入，然後欲出詔付刁。周王既入，始至階頭，帝逆遣傳詔，遏○使就東廂。○周侯未悟，即卻略下階。丞相披○撥○傳詔，徑至御牀。○前曰：「不審陛下何以見臣？」帝默然無言，乃探懷中黃紙詔裂擲之。由此皇儲始定。周侯方慨然愧歎曰：「我常自言勝茂弘，今始知不如也。」

○晉元帝，名睿，字景文，司馬懿之曾孫。西晉亡時，即位建康。謚法，始建國都曰元，故諡爲元帝。

①降，主階也。天子之位曰降，言為天下主也。②鄭后，字阿春，滎陽人。先嫁田氏，夫亡，依舅吳氏。

元帝納為夫人，生簡文帝。③明帝，名紹，字道畿，元帝之長子，在位三年。④倫，常也。⑤周顛，

王導也。⑥刁協，字玄亮，饒安人。累遷尚書令。⑦即周顛王導。⑧以逆相止曰退。⑨廂，廊

也。⑩從旁持曰披。⑪撥，振開也。⑫古人謂坐榻曰牀。

周伯仁為吏部尚書，在省①內，夜疾危急。時刁玄亮為尚書令，營救備親好之至，良久小損。②明日報仲智，③仲智狼狽④來。始入戶，刁下牀對之大泣，說伯仁昨危急之狀，仲智手批⑤之，刁為辟易⑥於戶側。既前，都不問病。直云：「君在中朝，與和長輿齊名，那與佞人刁協有情？」逕便出。

①省，禁署也。言入此中者，當察視不可妄也。②損，減也。③周嵩，字仲智，周顛之次弟也。④狼狽，猝遽也。⑤手擊也。⑥辟易，驚退也。

王含①作廬江郡，②貪濁狼籍。③王敦護其兄，故於眾坐稱「家兄在郡定佳，廬江人士咸稱之。」時何充為敦主簿，在坐正色曰：「充即廬江人，所聞異於

是。』敦默然。旁人爲之反側，○充晏然神意自若。

○晉王合，字處弘，琅邪人。累遷徐州刺史，光祿勳。○故城在今安徽霍丘縣西五十五里。○

狼籍，離披雜亂也。○反側，不安也。

王大將軍○既反，至石頭。周伯仁往見之，謂周曰：『卿何以相負？』對曰：『公戎車犯正，下官忝率六軍，而王師不振，以此負公。』

○卽王敦。○背恩忘德曰負。

蘇峻○既至石頭，百僚奔散。惟侍中鍾雅獨在帝○側，或謂鍾曰：『見可而進，知難而退，古之道也。君性亮直，必不容於寇讐。何不用隨時之宜，而坐待其斃邪？』鍾曰：『國亂不能匡，○君危不能濟，而各遜遁以求免，吾懼董狐○將執簡而進矣。』

○晉蘇峻，字子高，長廣掖人。咸和三年建康陷，峻自領尙書，陶侃誅之。○晉成帝也。○匡，救

也。○春秋時，晉國之史官也。趙穿弑晉靈公，趙盾不討賊，董狐書曰：『趙盾弑其君。』孔子曰：

「蓋狐，古之良史也。」

何次道、庾季堅，二人並爲元輔。成帝初崩，於時嗣君未定。何欲立嗣子，庾及朝議，以外寇方強，嗣子沖幼，乃立康帝。康帝登阼，會羣臣，謂何曰：「朕今所以承大業，爲誰之議？」何答曰：「陛下龍飛，此是庾冰之功，非臣之力。於時用微臣之議，今不覩盛明之世。」帝有慙色。

○晉庾冰，字季堅，太尉庾亮之弟，累遷車騎將軍、江州刺史。

○晉康帝，名岳，字世同，成帝同母

弟也，在位二年。

劉真長、王仲祖，共行，日旰未食。有相識小人貽其餐，肴案甚盛，真長辭焉。

仲祖曰：「聊以充虛，何苦辭？」真長曰：「小人都不可與作緣。」

○即劉惔、王濛。○言不可與小人接近也。

王修齡，嘗在東山，甚貧乏，陶胡奴爲鳥程，令送一船米遺之，卻不肯

取。直答語：「王修齡若饑，自當就謝仁祖索食，不須陶胡奴米。」

○晉王胡之，字修齡，琅邪人。歷吳興太守，拜使持節都督司州諸軍事，西中郎將，司州刺史。○

陶範，字道則，小字胡奴，陶侃諸子中之最知名者，歷尚書祕書監。○即今浙江吳興縣。

謝公聞羊綏○佳。致意令來，終不肯詣。後綏爲太學博士，因事見謝公，公卽取以爲主簿。

○晉羊綏，字仲彥，太山人。仕至中書侍郎。

孝武問王爽○『卿何如卿兄？』王答曰：『風流秀出，臣不如恭；○忠孝亦何可以假人。』

○晉王爽，字季明，小字曙，太原人。王濛之孫，王恭之第四弟，仕至侍中，贈太常。○王恭，字孝伯，

起家著作郎，歷丹陽尹，中書令，出爲五州都督，前將軍，青兗二州刺史。

王爽與司馬太傅飲酒，太傅醉，呼王爲小子。○王曰：『亡祖長史，與簡文皇帝爲布衣之交，亡姑亡姊，伉儷二宮，○何小子之有？』

○輕慢之稱也。○王濛女，名穆之，爲哀帝皇后。王蘊女，名法惠，爲孝武皇后。

張玄與王建武。先不相識，後遇於范豫章。許范令二人共語。張因正坐斂衽，王熟視良久，不對。張大失望，便去。范苦譬留之，遂不肯住。范是王之舅。王笑曰：「張祖讓王曰：『張玄吳士之秀，亦見遇於時。而使至於此，深不可解。』王笑曰：『張祖希若欲相識，自應見詣。』」范馳報張，張便束帶造之，遂舉觴對語，賓主無愧色。

○王忱初作荊州刺史，後爲建武將軍。○范寧，字武子，晉陽人。初爲餘杭令，遷豫章太守，著有

春秋穀梁傳集解。

○王忱之母，爲隕陽郡范汪女，名蓋，寧之妹也。

雅量第六

有往來者云：『庾公有東下意。』或謂王公：『可潛稍嚴以備不虞。』
王公曰：『我與元規，雖俱王臣，本懷布衣之好。若其欲來，吾角巾。』徑還烏衣，
何所稍嚴。』

○庾亮鎮武昌，有勸亮舉兵內向者。○即丞相王導。○巾之有棱角者，古隱居之服也。○

巷名，晉時貴族如王謝諸家，多居此巷，在今江寧縣城內。

庾太尉風儀偉長，不輕舉止，時人皆以爲假。亮有大兒，數歲，雅重之，質便
自如此，人知是天性。溫太真嘗隱幔怛之，此兒神色恬然，乃徐跪曰：『君侯
何以爲此？』論者謂『不減亮。』蘇峻時遇害，或云：『見阿恭，知元規非假。』

○庾亮之長子名會，字會宗，小字阿恭。○怛，驚也。○恬，安也。

郗太傅在京口，遣門生與王丞相書，求女壻。丞相語郗信：『君往東廡，任意選之。』門生歸白郗曰：『王家諸郎，亦皆可嘉，聞來覓壻，咸自矜持。唯有一郎在東牀上坦，腹臥，如不聞。』郗公云：『正此好。』訪之，乃是逸少，因嫁女與焉。

○明王世懋云：『晉人以便爲信。』 ○坦，平也。

周仲智飲酒醉，瞋目還面謂伯仁曰：『君才不如弟，而橫○得重名。』須臾，舉蠟燭火擲伯仁。伯仁笑曰：『阿奴○火攻，固出下策耳。』

○橫，讀去聲，不順理也。 ○阿奴，當是周嵩小字。但本書屢見，他處梁劉孝標注引鄧粲晉紀曰：

『阿奴，嵩之弟周謨也。』

顧和○始爲揚州○從事，月旦○當朝。未入頃，停車州門外，周侯詣丞相，歷和車邊。和寬謔，夷○然不動。周既過，反還指顧心曰：『此中何所有。』顧搏蟲如故，徐應曰：『此中最是難測地。』周侯既入，語丞相曰：『卿州吏中有一令僕○才。』

○晉顯和，字君孝，吳郡顧榮之族，仕至尚書令。○晉明帝時，揚州統丹陽吳郡吳興新安東陽臨海永嘉宣城義興晉陵等郡。○月朔之日也。○夷，安也。○謂尙書令與僕射也。

謝太傅盤桓○東山，時與孫興公諸人汎海戲，風起浪涌，孫王○諸人色並遽，○便唱使還。太傅神情方王，○吟嘯不言。舟人以公貌閑意說，猶去不止。既風轉急浪猛，諸人皆諠動不坐。公徐云：『如此，將無歸。』衆人即承響而回，於是審其量足以鎮安朝野。

○盤桓，不進也。○孫綽與王羲之也。○遽，急也。○王，讀去聲，盛也。

桓公○伏甲設饌，廣延朝士，因此欲誅謝安。王坦之○王甚遽，問謝曰：『當作何計？』謝神意不變，謂文度曰：『晉祚存亡，在此一行。』相與俱前，王之恐狀，轉見於色。謝之寬容，愈表於貌。望階趨席，方作洛生詠，○諷○『浩浩洪流。』桓憚其曠遠，乃趣○解兵。王謝舊齊名，於此始判優劣。

○即桓溫。○王坦之，字文度，太原人。累遷侍中，中書令，領北中郎將，徐兗二州刺史。○謝安

能作洛下書生詠，而少有鼻疾，語音濁。後名流多戲其詠，弗能及，手掩鼻而吟焉。④謳，誦也。

⑤嵇康贈兄熹秀才入軍詩句也。⑥趣，遽也。

支道林還東，時賢並送於征虜亭。①蔡子叔②前至，坐近林公。謝萬石③

後來，坐小遠。蔡暫起，謝移就其處。蔡還，見謝在焉。因合樽舉謝擲地，自復坐。謝冠

纓④傾脫，乃徐起振衣就席。神意甚平，不覺瞋沮。坐定，謂蔡曰：「卿奇人，殆壞我

面。」蔡答曰：「我本不為卿面作計。」其後二人俱不介意。

①晉哀帝迎支遁游京邑，遁思會稽而歸。②晉惠帝時，征虜將軍謝安立此亭，因以為名。此謝

安，非太傅謝安也。③蔡系，字子叔，濟陽人。蔡謨之次子，仕至撫軍長史。④謝萬，字萬石，太傅

謝安之弟，歷吏部郎，西中郎將，豫州刺史，散騎常侍。⑤纓者，帽髮之巾也。

戴公①從東出，謝太傅往看之。謝本輕戴，見但與論琴書。戴既無吝色，而談

琴書愈妙，謝悠然知其量。

①晉戴逵，字安道，譙國人。後徙居會稽之剡縣，好鼓琴，善屬文，屢辭徵命。

謝公與人圍棋，俄而謝玄淮上。信至，看書竟，默然無言。徐向局，客問『淮上利害？』答曰：『小兒輩大破賊。』意色舉止，不異於常。

○淮水之上游也。○苻堅之衆號百萬，進屯壽陽。謝玄與從弟琰等，選精銳決戰，射傷苻堅，俘獲數萬計。

識鑒第七

曹公○少時見喬玄，○玄謂曰：『天下方亂，羣雄虎爭，撥○而理之，非君乎？然君實是亂世之英雄，治世之姦賊。恨吾老矣！不見君富貴，當以子孫相累。』

○曹操，字孟德，小字阿瞞，本姓夏侯，其父夏侯嵩為宦官曹騰養子，遂改姓曹。漢獻帝時，為大將軍。進位丞相，封魏王。長子曹丕篡漢，追尊為武帝。○漢喬玄，字公祖，雖陽人，累遷尚書令。○撥，治也。

曹公問裴潛○曰：『卿昔與劉備○共在荊州，卿以備才如何？』潛曰：『使居中國，能亂人，不能為治。若乘○邊守險，足為一方之主。』

○裴潛，字文行，河東人。○劉備，字玄德，涿縣人。漢景帝子中山靖王勝之後，曹丕篡漢時，即帝位於成都，在位三年，諡曰昭烈帝。○乘，登也。

何晏，鄧颺，夏侯玄，並求傅嘏交，而嘏終不許。諸人乃因荀彧說合之，謂嘏曰：『夏侯太初，一時之傑士。虛心於子，而卿意懷不可。交合則好成，不合則致隙。』二賢若穆，則國之休也。此藺相如所以下廉頗也。傅曰：『夏侯太初志大心勞，能合虛譽，誠所謂利口覆國之人。何晏鄧颺，有爲而躁，博而寡要，外好利而內無關籥。貴同惡異，多言而妬。前多言多譽，妬前無親。以吾觀之，此三賢者，皆敗德之人爾。遠之猶恐罹禍，況可親之邪？』後皆如其言。

○晉鄧颺，字玄茂，南陽人。鄧禹之後，明帝時爲尚書郎，後遷侍中尚書。○夏侯玄，字太初，譙國人。夏侯尚之子，仕至太常。

○傅嘏，字蘭頌，泥陽人。傅介子之後，累遷河南尹尚書。○荀彧，字奉倩，潁川人。太尉荀彧之少子。

○際，怨也。○穆，和也。○休，慶也。○戰國時，趙藺相如位在廉頗右，頗怒，欲辱之。相如常避匿，謂其舍人曰：『吾何畏廉將軍哉，秦以吾二人，故不敢加兵於趙。今兩虎鬪，勢不俱生，吾以公家急而後私讎也。』頗聞謝罪。○橫持門戶之木曰關，籥與闕通，上貫闕下插地之直木曰闕。

○己不如人而嫉之曰妬。○釁，瑕隙也。

石勒○不知書，使人讀漢書，○聞『酈食其』○勸立六國○後刻印將授之。

大驚曰：『此法當失，云何得遂有天下？』至『留侯諫』。迺曰：『賴有此耳。』

○石勒，字世龍，上黨人。匈奴之苗裔也。晉元帝太興二年，勒僞稱趙王。成帝咸和五年，僞稱正號。

至咸和七年死，僞諡明皇帝。○後漢扶風班固所撰，起高祖終孝平王莽之誅。二百三十年，凡

八十餘字。固卒後，和帝令其妹班昭補成八表及天文志。書共一百二十卷，唐顏師古注。○漢

酈食其，陳留人。酈，音歷。食，音異。其，音基。○戰國時函谷以東之六國，楚、齊、燕、韓、魏、趙是也。○

云，猶言有如是也。

武昌○孟嘉○作庾太尉州從事，已知名。褚太傅有知人鑒能，豫章還，過武

昌。問庾曰：『聞孟從事佳，今在此不？』庾云：『卿自求之。』褚眄睐○良久，指嘉

曰：『此君小異，得無是乎？』庾大笑曰：『然。』于時既歎褚之默識，又欣嘉之見

賞。

○卽今湖北武昌縣。○晉孟嘉，字萬年，後爲桓溫參軍，轉從事中郎，遷長史。○眄睐，眷顧貌。

戴安道年十餘歲，在瓦官寺畫。王長史見之曰：『此童非徒能畫，亦終當致名。恨吾老，不見其盛時耳。』

小庾○臨終，自表以子園客○爲代。朝廷慮其不從命，未知所遣，乃共議用桓溫。劉尹曰：『使伊去，必能克○定西楚，然恐不可復制。』

○太尉庾亮之弟庾翼也。○庾爰之，字仲真，小字園客，翼之次子也。○以肩任物曰克。○

今湖北省西部諸縣也。

謝公在東山畜○妓，簡文曰：『安石必出。既與人同樂，亦不得不與人同憂。』

○畜，養也。

褚期生○少時，謝公甚知之。恆云：『褚期生若不佳者，僕不復相士。』

○晉褚爽，字茂弘，河南人。太傅褚裒之孫，累遷中書郎，義興太守。

王忱死，西鎮○未定，朝貴人人有望。時殷仲堪在門下，○雖居機要，資名輕小，人情未以方嶽○相許。晉孝武欲拔親近腹心，遂以殷爲荊州。事定，詔未出，王

珣問殷曰：『陝西^④何故未有處分？』殷曰：『已有人。』王歷問公卿，咸云：『非。』王自計才地必應在己。復問：『非我邪？』殷曰：『亦似非。』其夜詔出，用殷。王語所親曰：『豈有黃門郎而受如此任，仲堪此舉，迺是國之亡徵。』

○出鎮西方之人也。○晉孝武帝用仲堪爲黃門侍郎，因給事黃門侍郎與侍中，俱管門下衆

事，遂名其官署爲門下省。○筭領兵權，駐節州郡，爲國重鎮者，如四方之嶽也。○荊州所統

之郡縣，多爲周初召公所主，陝以西之地，故稱陝西。

賞譽 第八上

陳仲舉嘗歎曰：『若周子居者，真治國之器。譬諸寶劍，則世之干將。』

○漢周乘，字子居，汝南人。爲太山太守，有惠政。○春秋時，吳王闔閭請吳人干將作劍，干將與

其妻莫邪造成陰陽二劍。陽曰干將，陰曰莫邪。

王濬沖裴叔則二人總角，詣鍾士季。須臾去後，客問鍾曰：『向二童何如？』

鍾曰：『裴楷清通，王戎簡要。後二十年，此二賢當爲吏部尙書，冀爾時天下無滯才。』

王戎目：『山巨源如璞玉渾金，人皆歛其寶，莫知名其器。』

○目，稱也。

山公舉阮咸爲吏部郎，目曰：『清真寡欲，萬物不能移也。』

○晉阮咸，字仲容，陳留人。阮籍之兄子也。

庾子嵩目『和嶠森森如千丈松。雖磊砢○有節目，○施之大厦，』有棟梁之用。

○磊砢，魁畧貌。○節目，木理之剛，目則木理之精。

王汝南○既除所生服，遂停墓○所。兄子濟每來拜墓，略不過叔，叔亦不候濟。脫時過，○止寒溫而已。後聊○試問近事，答對甚有音辭，出濟意外，濟極愧愕。仍與語，轉造精微。濟先略無子姪之敬，既聞其言，不覺懷然，心形俱肅。遂留其語，彌日累夜。濟雖雋爽，○自視缺然。乃喟然嘆曰：『家有名士三十年而不知。』濟去，叔送至門。濟從騎有一馬絕難乘，少能騎者。濟聊問：『叔好騎乘不？』曰：『亦好爾。』濟又使騎難乘馬。叔姿形既妙，回策○如縈，○名騎無以過之。濟益嘆其難測，非復一事。既還，渾○問濟：『何以暫行累日？』濟曰：『始得一叔。』渾問其故，濟具歎述如此。渾曰：『何如我？』濟曰：『濟以上人。』武帝每見濟，輒以湛調

①之曰：『卿家癡叔①死未？』濟常無以答。既而得叔後，武帝又問如前。濟曰：『臣叔不癡。』稱其實美。帝曰：『誰比？』濟曰：『山濤以下，魏舒②以上。』於是顯名，年二十八始宦。

①晉王湛字處沖，太原人。司徒王渾之弟，仕至汝南內史。②渾湛之父王昶之墓也。③或有時過之也。④聊，且略之辭。⑤傷，卓特也。爽，俊邁不羣之意。⑥策，馬箠也。⑦縶，旋繞也。

⑧王渾，字玄沖，太原人。魏司空王昶之子。仕至司徒，襲爵京陵侯。⑨調，嘲笑也。⑩王湛有隱德，人莫能知。兄弟宗族，皆以爲癡。⑪魏舒，字陽元，任城人。初爲鍾毓長史，累遷侍中司徒。

洛中①雅雅②有三嘏。劉粹③字純嘏，宏④字終嘏，漠⑤字沖嘏，是親兄弟。王安豐甥，⑥並是王安豐女婿。宏，真長祖也。洛中錚錚⑦馮惠卿，⑧名臻，是播⑨子。臻與邢喬，⑩俱司徒李胤⑪外孫，及胤子順，⑫並知名。時稱『馮才清，李才明，純⑬粹⑭邢。』

①卽洛陽。②溫文貌。③晉劉粹，沛國人。歷侍中，南中郎將。④劉宏，歷祕書監，光祿大夫。

⑤劉漢與王衍友善。自相國右長史，出爲襄州刺史。⑥宋劉孝標注引劉氏譜云：「劉邪妻，武

周女，生粹宏漢，非王氏甥。」⑦剛正不阿也。⑧馮蓀，長樂人。仕至侍中。⑨馮播，字友聲，位

至大宗正。⑩邢喬，字曾伯，河間人。仕至司隸校尉。⑪李胤，字宣伯，遼東人。歷官內外，位至司

徒。⑫李順，字曼長，仕至太僕卿。⑬中外皆善曰純。⑭粹，不雜也。

賞譽 第八下

庾子躬○有廢疾，甚知名。家在城西，號曰「城西公府」○

○晉庾璿，字子躬，潁川人。太常庾峻之次子，仕至太尉掾。○公府，三公之府也。

王太尉云：「郭子玄語議，如懸河寫○水，注而不竭。」

○寫，洩也。

王公○目太尉，○「巖巖○清峙，○壁立千仞。」

○即王導。○即王衍。○高峻貌。○清，青也。去濁遠穢，色如青也。峙，屹立也。

蔡司徒○在洛，見陸機兄弟住參佐廡○中，三間瓦屋。士龍住東頭，士衡住

西頭。士龍爲人文弱可愛。士衡長七尺餘，聲作鍾聲，言多愜慨。

○晉蔡謨，字道明，陳留人。避亂渡江，爲王敦從事中郎，司徒左長史。平蘇峻，賜爵。○掾，屬之官。

署也。

王敦爲大將軍，鎮豫章。衛玠避亂，從洛投敦。相見欣然，談話彌日。于時謝鯤爲長史，敦謂鯤曰：「不意永嘉之中，復聞正始之音。」阿平若在，當復絕倒。」

○晉懷帝年號。 ○魏廢帝年號。 ○卽王澄。 ○絕倒，傾倒佩服之意。

何次道往丞相許，丞相以麈尾指坐，呼何共坐。曰：「來來，此是君坐。」

○鹿大者曰麈，羣鹿隨之，視麈尾所轉而往。古之談者揮焉。

王藍田爲人晚成，時人乃謂之癡。王丞相以其東海子，辟爲掾。常集聚，

王公每發言，衆人競贊之。述於末坐曰：「主非堯舜，何得事事皆是？」丞相甚相

嘆賞。

○晉王述，字懷祖，太原人。襲爵藍田侯。 ○卽王承。

庾公爲護軍，屬桓廷尉。覓一佳吏，乃經年。桓後遇見徐寧而知之。遂致

於庾公曰：『人所應有，其不必有。人所應無，已不必無。真海岱清士。』

○晉桓彝，字茂倫，譙國人。漢五更桓榮十世孫。避亂渡江，累遷散騎常侍。○徐寧，字安期，東海

人。累遷吏部郎左將軍，江州刺史。

世稱『庾文康爲豐年玉，穉恭爲荒年穀。』庾家論云：『是文康稱恭爲荒年穀，庾長仁爲豐年玉。』

○晉庾統，字長仁，太尉庾亮弟庾懌之子。仕至尋陽太守。

蕭中郎，○孫丞公，○婦父，劉尹在撫軍坐，時擬爲太常。劉尹云：『蕭祖周不知便，可作三公。』不自此以還，無所不堪。』

○晉蕭翰，字祖周，樂安人。歷常侍，國子博士。○孫統，字丞公，孫綽之兄也。○太尉，司徒，司空

也。

桓溫行經王敦墓邊過，望之云：『可兒可兒。』

王仲祖稱『殷淵源非以長勝人，處長亦勝人。』

王長史謂林公，『真長可謂金玉滿堂。』林公曰：『金玉滿堂，復何爲簡選？』王曰：『非爲簡選，直致言處自寡耳。』

王仲祖劉真長造殷中軍談，談竟，俱載去。劉謂王曰：『淵源真可。』王曰：『卿故墮其雲霧中。』

殷中軍道韓太常曰：『康伯少自標置，居然是出羣器。及其發言遺辭，往往有情致。』

○標舉名目，自爲位置也。

簡文道：『王懷祖才旣不長，於榮利又不淡。直以真率少許，便足對人多多許。』

許玄度送母，始出都，人問劉尹：『玄度定稱所聞不？』劉曰：『才情過於所聞。』

○梁劉孝標注云：『玄度母，華軼女也。許詢集及晉陽秋載詢出都迎姊。此言送母疑繆矣。』

○才者，天之良質也。情即心之用。

殷淵源在墓所，幾十年。于時○朝野以擬管葛，○起不起以下江左興亡。

○晉穆帝永和初年也。○春秋時齊之管夷吾，三國時蜀之諸葛亮。

桓大司馬病，謝公往省病，從東門入。桓公遙望嘆曰：『吾門中久不見如此人。』

王長史云：『劉尹知我，勝我自知。』

初法汰○北來未知名，王領軍○供養之。每與周旋行，來往名勝許，輒與俱。不得汰，便停車不行，因此名遂重。

○法汰，釋道安之友。一說，即安公弟子也。○王洽，字敬和，晉丞相王導之第三子也。為導諸子

中之最知名者。累遷吳郡內史，穆帝欲用為中書令，苦讓不受。升平二年卒於官。

桓公語嘉賓，○『阿源○有德有言。向使作令僕，足以儀刑。○百揆。○朝廷用違其才耳。』

○晉鄒超，字景興，小字嘉賓，高平人。司空鄒愔之子。累遷中書郎，司徒左長史。○即殷浩。○法式也。○揆度百事，總持國政之官也。

謝太傅道安北○「見之乃不使人厭，然出戶去，不復使人思。」

○王坦之之卒後，晉孝武帝追贈安北將軍。○梁劉字標注云：「謝公蓋以坦之好直言，故不厭爾。」

劉尹云：「見何次道飲酒，使人欲傾家釀。」

謝鎮西○道敬仁○「文學鏃鏃，無能不新。」

○即謝尚。○即王修。○鏃鏃者，蓋有挺出之義。

劉尹道江道羣○「不能言而能不言。」

○晉江灌，字道羣，陳留人。僕射江影之從弟也。仕尚書中護軍。

謝太傅重鄧僕射，○常言「天地無知，使伯道無兒。」

○晉鄧攸，字伯道，平陽人。避難渡江，仕至尚書左僕射。○攸避難於道中，棄己子，全弟子，後無

繼嗣。

范豫章謂王荊州。○『卿風流。○雋望，真後來之秀。』王曰：『不有此舅，焉有此甥。』

○即王忱。 ○風流，品格也。 ○范甯之妹，王忱之母也。

司馬太傅爲二王目曰：『孝伯。○亭亭。○直上，阿大。○羅羅。○清疎。』

○即王恭。 ○聳立貌。 ○即王忱。 ○清疎之貌。

王恭有清辭簡旨，能敘說而讀書少，頗有重出。有人道：『孝伯常有新意，不覺爲煩。』

品藻 第九

龐士元至吳，○吳人竝友之。見陸績○顧劭○全琮○而爲之目曰：『陸子所謂騫馬有逸足⑤之用，顧子所謂騫牛可以負重致遠。』或問：『如所目陸爲勝邪？』曰：『騫馬雖精速，能致一人耳。騫牛一日行百里，所致豈一人哉。』吳人無以難。『全子好聲名，似汝南樊子昭。』

○龐士元爲周瑜功曹，險卒，遂喪至吳。○陸績，字公紀，仕至鬱林太守。○顧劭，字孝則，吳郡

人。起家爲豫章太守。○全琮，字子黃，吳郡人。爲大司馬。○逸足，疾足也。○樊子昭年至七

十，退能守靜，進不苟競。

顧劭嘗與龐士元宿語，問曰：『聞子名知人，吾與足下孰愈？』曰：『陶冶○世俗，與時浮沈，○吾不如子。論王霸之餘策，○覽倚仗○之要害，○吾似有一日

之長。』勸亦安其言。

○化育裁成之義。○活潑而不固執也。○留遺之策略也。○憑恃之地勢也。○在我為

要在敵為害也。

諸葛瑾○弟亮及從弟誕，○竝有盛名，各在一國。于時以為『蜀得其龍，吳得其虎，魏得其狗。』誕在魏，與夏侯玄齊名。瑾在吳，吳朝服其弘量。』

○諸葛瑾，字子瑜，其先葛氏琅邪諸縣人。後徙陽都，陽都先有姓葛者，時人謂『諸葛』，因為氏。

瑾仕於吳，累遷豫州牧。○諸葛誕，字公休，初為吏部郎，累遷揚州刺史，鎮東將軍司空。

司馬文王問武陔○『陳玄伯○何如其父司空○』陔曰：『通雅博暢，能

以天下聲教○為己任者不如也。明練簡至，立功立事過之。』

○晉武陔，字元夏，沛國人。魏光祿大夫武周之子。仕至左僕射。○即陳泰。○漢太丘長陳實

之孫陳羣也。○天子之聲威文教也。

正始中人士比論○以五荀方五陳。荀淑方陳實，荀靖方陳謐，荀爽方陳紀，

荀彧方陳羣，荀顛^①方陳泰。又以八裴方八王。裴徽^②方王祥，裴楷方王夷甫，裴康^③方王綬，裴綽^④方王澄，裴瓚^⑤方王敦，裴遐^⑥方王導，裴頠方王戎，裴邈^⑦方王玄^⑧。

① 正始為魏廢帝之年號。裴王諸人之事跡，多在晉代。當正始時，有年尚幼稚者。當非同時之比論也。

② 晉荀顛，字景倩，荀彧之子。晉受禪，封臨淮公，轉太尉。卒，諡康公。

③ 魏裴徽，字文季，河東人。仕至冀州刺史。

④ 晉裴康，字仲豫，裴徽之子。歷太子左率。

⑤ 晉有兩王綬，一為僕射王綬之子，字彥猷，位至中書令。一為安豐侯王戎之子，字萬子，辟太尉掾，不就，年十九卒。

⑥ 晉裴綽，字仲舒，裴楷之弟，歷中書黃門侍郎。

⑦ 晉裴瓚，字國寶，裴楷之子，終中書郎。

⑧ 晉裴遐，字叔道，河東人。長水校尉裴緯之子，辟司空掾，散騎郎。

⑨ 晉裴邈，字景聲，河東人。歷太傅從事中郎，左司馬。

⑩ 晉王玄，字眉子，太尉王衍之子，為陳留太守。

之儷。⑪

王夷甫以王東海^①比樂令，故王中郎^②作碑^③云：「當時標榜^④，為樂廣

○即王承。 ○即王坦之。 ○王承墓碑也。 ㊟表暴而稱揚之也。 ㊟僥倖也。

王大將軍下，○庾公問「聞卿有四友，何者是？」答曰：「君家中郎，○我家太尉，○阿平，胡母彥國。阿平故當最劣。」庾曰：「似未肯劣。」庾又問「何者居其右？」王曰：「自有人。」又問「何者是？」王曰：「噫！○其自有公論。」左右躡公，公乃止。

○從長江之上游而下也。 ○即庾敞。 ○即王衍。 ㊟歎聲。

明帝○問謝鯤，「君自謂何如庾亮？」答曰：「端委○廟堂，使百官準則，臣不如亮。一丘一壑，○自謂過之。」

○晉元帝之子。 ○端委，禮衣也。禮衣端正無殺，故曰端。文德之衣尚褒長，故曰委。 ○隱者所處之地也。

宋禧○曾為王大將軍妾，後屬○謝鎮西。鎮西問禧，「我何如王？」答曰：「王比使君，○田舍貴人耳。」鎮西妖冶○故也。

○明王世懋補注云：『宋樟是綠珠女弟。』○屬從也。○古稱刺史曰使君。凡奉使之官，亦以使君稱之。○妖，黠也。冶，裝飾也。

世論『溫太真』○是過江○第二流○之高者。』時名輩共說人物，第一將盡之間，溫常失色。

○卽溫嶠。○晉室東遷，士大夫多渡江而至建業也。○猶言第二等也。

何次道○爲宰相，人有譏其信任不得其人。阮思曠○慨然曰：『次道自不至此。但布衣超居宰相之位，可恨唯此一條而已。』

○卽何充。○卽阮裕。

時人道阮思曠『骨氣不及右軍，簡秀不如真長，韶潤○不如仲祖，思致○不如淵源，而兼有諸人之美。』

○韶，美也。潤，飾也。○致，密緻也。

殷侯○既廢，○桓公語諸人曰：『少時與淵源共騎竹馬，我棄去，已輒取之。』

故當出我下。」

○即殷浩。○桓溫忌浩，因浩兵敗，奏廢爲庶人。

謝公與時賢共賞說，遏胡兒。○並在坐。公問李弘度。○曰：「卿家平陽，何如樂令？」於是李潛然流涕。曰：「趙王篡逆，樂令親授璽綬。亡伯雅正，恥處亂朝，遂至仰藥，恐難以相比。此自顯於事實，非私親之言。」謝公語胡兒曰：「有識者果不異人意。」

○謝玄與謝朗也。○即李充。○晉李重，字茂重，江夏人。歷吏部郎，平陽太守。○惠帝永寧

元年，趙王黜惠帝，自稱帝。○天子之印章及組綬也。

王修齡。○問王長史：「我家臨川，何如卿家宛陵？」長史未答，修齡曰：「臨川譽貴。」長史曰：「宛陵未爲不貴。」

○即王胡之。○王羲之自會稽王友，改授臨川太守。○王述從驃騎功曹出爲宛陵令。

劉尹至王長史許清言，時荀子年十二，倚牀邊聽。既去，問父曰：「劉尹語，何

如尊？』長史曰：『韶音。』令辭不如我。往輒破的。勝我。』

○尊，君父之稱也。○韶音，音如舜樂之韶之美善也。○破的，謂射中的也。以喻言之中理也。

有人問謝安石王坦之優劣於桓公，桓公停欲言，中悔曰：『卿喜傳人語，不能復語卿。』

孫興公許玄度皆一時名流。或重許高情，則鄙孫穢行。或愛孫才藻，而無取於許。

○名流，名士之流也。人之類別，如水之分流也。○晉書孫綽傳中，未載綽之穢行。

王僧恩○輕林公，藍田○曰：『勿學汝兄，汝兄自不如伊。』

○晉王禕之，字文邵，小字僧恩，王述之次子，任至中書郎。○即王述。○王述之長子王坦之也。

庾道季○云：『廉頗藺相如雖千載上死人，懍懍○恆如有生氣。曹蜎○李志○雖見在，厭厭○如九泉下人。人皆如此，便可結繩而治，但恐狐狸獯○貉○』

① 噉盡。」

○晉庾蘇，字道季，太尉庾亮之子，歷任至丹陽尹，兼中領軍。○敬畏也。○曹茂之，字永世，小

字蝮，彭城人。仕至尚書郎。○李志，字溫祖，江夏人。仕至員外常侍，南康相。○安靜也。○上

古未有文字時，結繩以記事也。○獮，本作獮，野豬也。○貉，本作貉，亦作貉，似狸。

王黃門○兄弟三人，俱詣謝公。子猷子重○多說俗事，子敬○寒溫而已。既

出，坐客問謝公『向三賢孰勝？』謝公曰『小者最勝。』客曰『何以知之？』謝

公曰『吉人之辭寡，躁人之辭多，○推此知之。』

○晉王徽之，字子猷，王羲之之第五子，仕至黃門侍郎。○王操之，字子重，王羲之之第六子，歷

秘書監，侍中，尚書，豫章太守。○王獻之，字子敬，王羲之之第七子，任至中書令。○見易繫辭。

謝公問王子敬『君書何如君家尊？』答曰『固當不同。』公曰『外人論

殊不爾。』王曰『外人那得知。』

王子猷子敬兄弟，共賞高士傳○人及贊，子敬賞『井丹高潔。』子猷云：

『未若長卿慢世。』

○高士傳有二種，一為嵇康撰，一為皇甫謐撰。王徽之獻之所賞之高士傳，乃嵇康所撰。○漢

井丹，字大春，扶風人。高士傳贊曰：『井丹高潔，不慕榮貴。』○漢司馬相如，字長卿，成都人。高

士傳贊曰：『長卿慢世，越禮自放。』

有人問袁侍中曰：『殷仲堪何如韓康伯？』答曰：『理義所得優劣，乃

復未辨。然門庭蕭寂，居然有名士風流，殷不及韓。』故殷作誄云：『荆門晝掩，閑

庭晏然。』

○晉袁裕之，字元祖，陳郡人。歷黃門侍郎，安帝義熙初，為侍中。○卽韓伯。

桓玄為太傅，大會朝臣畢集。坐裁竟，問王楨之曰：『我何如卿第七叔？』

于時賓客為之咽氣，王徐徐答曰：『亡叔是一時之標，公是千載之英。』一

坐懽然。

○晉王楨之，字公幹，琅邪人。王徽之之子，歷侍中，大司馬長史。○王獻之為王楨之之第七叔。

◎標，表也。◎英，俊選之尤者。

桓玄問劉太常○曰：『我何如謝太傅？』劉答曰：『公高，太傅深。』又曰：『何如賢舅子敬？』答曰：『榘梨橘柚，各有其美。』

◎晉劉瑾，字仲璋，南陽人。歷尚書太常卿。◎劉瑾之母，王羲之之女也。

規箴第十

漢武帝○乳母嘗於外犯事，帝欲申憲，○乳母求救東方朔。○朔曰：『此非唇舌所爭。爾必望濟者，將去時，但當屢顧帝，慎勿言。此或可萬一冀耳。』乳母既至，朔亦侍側。因謂曰：『汝癡耳，帝豈復憶汝乳哺時恩邪。』帝雖才雄心忍，亦深有情戀。乃悽然愍之，即赦免罪。

○漢武帝，名徹，景帝之子，在位五十四年。○致之於法也。○東方朔，字曼倩，平原厭次人，或

作南陽步廣里人，或以朔為楚人。武帝時，拜郎中。宣帝初，棄官而去。史記滑稽傳，載救此乳母者，

為帝所幸倡郭舍人。

京房○與漢元帝○共論，因問帝：『幽○厲○之君何以亡？所任何人？』答曰：『其任人不忠。』房曰：『知不忠而任之何邪？』曰：『亡國之君，各賢其臣，豈

知不忠而任之。』房稽首曰：『將恐今之視古，亦猶後之視今也。』

○京房，字君明，東郡頓丘人。初以孝廉爲郎，後爲東郡。○漢元帝，名奭，宣帝之子，在位十六年。

○周幽王，名宮涅，宣王之子。在位十一年，爲犬戎所殺。諡法：『壅遏不通曰幽。』○周厲王，

名胡，夷王之子。在位三十七年，出居於處，周召共和十四年。諡法：『殺戮無辜曰厲。』

孫皓問丞相陸凱曰：『卿一宗在朝有幾人？』陸曰：『二相，五侯，將軍十

餘人。』皓曰：『盛哉！』陸曰：『君賢臣忠，國之盛也。父慈子孝，家之盛也。今政荒

民弊，覆亡是懼，臣何敢言盛。』

○吳陸凱，字敬風，丞相陸遜之族子，初爲建忠校尉，累遷左丞相。

何晏鄧颺令管輅○作卦云：『不知位至三公不。』卦成，輅稱引古義，深以

戒之。颺曰：『此老生之常談。』晏曰：『知幾其神乎？』古人以爲難。交疎吐誠，

今人以爲難。今君一面盡二難之道，可謂明德惟馨。詩不云乎，中心藏之。何日

忘之。』

○魏管略，字公明，平原人。明周易，善卜筮。○謂老年書生平常之議論，不足深信也。○此易

繫辭也。疏云：『知幾其神乎者，神道微妙，寂然不測。人若能豫知事之幾微，則能與其神道合會

也。』○書君陳篇文也。疏云：『明德之所遠及，乃惟爲馨香耳。』○詩小雅隰桑卒章之句

也，鄭箋云：『藏，善也。我心善此君子，又誠不能忘也。』

晉武帝既不悟太子○之愚，必有傳後意，諸名臣亦多獻直言。○帝嘗在陵

雲臺○上坐，衛瓘○在側，欲申其懷。因如醉跪帝前，以手撫牀曰：『此坐可惜！』

帝雖悟，因笑曰：『公醉邪？』

○惠帝爲武帝之次子，泰始三年，立爲皇太子。○惠帝之爲太子，咸謂不能親政事。○詳於

巧藝第二十一。○衛瓘，字伯玉，安邑人。善草書，官至太保，追封關陵郡公。

王夷甫婦，郭泰寧○女。才拙而性剛，聚斂○無厭，干豫人事，○夷甫患之而

不能禁。時其鄉人幽州○刺史李陽○京都大俠，○猶漢之樓護，○郭氏憚之。夷

甫驟諫之，乃曰：『非但我言卿不可，李陽亦謂卿不可。』郭氏小爲之損。

○晉郭豫，字泰簡，太原人。仕至相國參軍。○聚，積也。斂，收也。○參預他人之事也。○晉幽

州治涿，即今直隸涿縣。○李陽，字景祖，高尚人。武帝時爲幽州刺史。○好任俠爲同黨所推

重者。○樓護，字君卿，齊人。母死送葬，車三千兩。仕至天水太守。

王夷甫雅尙玄遠，常嫉其婦貪濁，口未嘗言錢字。婦欲試之，令婢以錢遶牀，
不得行。夷甫晨起，見錢闔○行，呼婢曰：『舉卻阿堵○物。』

○闔，音艾。隔也。○阿堵，當時俗語。猶今言這箇。

王平子○年十四五，見王夷甫妻郭氏貪，欲令婢路上儻糞。平子諫之，並言
不可。郭大怒，謂平子曰：『昔夫人○臨終，以小郎囑○新婦，不以新婦囑小郎。』
急捉衣裾，○將與杖。平子饒力，○爭得脫，踰窗而走。

○即王澄，王夷甫之弟也。○澄之母，樂安任氏女也。○囑，託也。○裾，衣袂也。即今俗所謂

大襟。○饒力，多力也。

陸玩拜司空，有人詣之，索美酒，得，便自起瀉箸梁柱間地。祝曰：『當今乏才，

以爾爲柱石之用，莫傾人棟梁。」玩笑曰：「戢○卿良箴。」

○戢藏也。

小庾在荊州公朝大會，問諸僚佐曰：「我欲爲漢高魏武○何如？」一坐莫答。長史江彪○曰：「願明公爲桓文○之事，不願作漢高魏武也。」

○欲效劉邦曹操以智力取天下也。○晉江彪，字思玄，陳留人。累遷尚書左僕射，護軍將軍。

○齊桓公，名小白。晉文公，名重耳。二公皆諸侯盟主，懷夷狄以尊周室者。

遠公在廬山○中，雖老講論不輟，弟子中或有墮○者。遠公曰：「桑榆之光，理無遠照。但願朝陽之暉○與時竝明耳。」執經登坐，諷誦朗暢，詞色甚苦。高足之徒，○皆肅然增敬。

○廬山在江西星子縣西北，九江縣南。○墮，與惰通。○日落之時，其光尙留於桑榆之上。以

喻人之晚年也。○人當少年時，如日初出之光也。○生徒中之程度過人者。

桓玄欲以謝太傅宅爲營，謝混○曰：「召伯○之仁，猶惠及甘棠。○文靖○

之德，更不保五畝之宅。」玄慙而止。

○晉謝混，字叔源，小字益壽，謝安之孫。歷中書令、中領軍、尚書左僕射。

○召伯，姬姓，名奭。食采

於召，作上公，爲二伯。

○周武王之時，召公爲西伯。行政於南土，決訟於小棠之下，國人愛召伯

而敬其樹。○謝安臨曰：文靖。

捷悟第十一

楊德祖○爲魏武主簿。時作相國門，始構榱桷。○魏武自出看，使人題門作活字，便去。楊見，卽令壞之，旣竟曰：『門中活，闕字。王正嫌門大也。』

○楊修，字德祖，弘農人。魏武爲丞相，辟爲主簿。○榱桷，屋椽也。

人餉魏武一椀酪，魏武噉少許。蓋頭上題合字以示衆，衆莫能解。次至楊脩，脩便噉曰：『公教人噉一口也，復何疑。』

魏武嘗過曹娥碑○下，楊脩從。…背上見題作『黃絹幼婦外孫豔白』八字。魏武謂脩曰：『解不？』答曰：『解。』魏武曰：『卿未可言，待我思之。』行三十里，魏武乃曰：『吾已得。』令脩別記所知。脩曰：『黃絹，色絲也，於字爲絕。幼婦，少女也，於字爲妙。外孫，女子也，於字爲好。豔白，受辛也，於字爲辭。所謂絕妙好辭。』

也。』魏武亦記之，與脩同。乃歎曰：『我才不及卿，乃覺三十里。』

○漢曹盱，上虞人。有女曹娥。盱死於江，不得其尸。時娥年十四，覓父尸，自投於江而死。經五日，抱父尸出。縣長度尚，悲憐其義，爲之改葬。命其弟子作碑，以表其孝。

夙惠第十二

賓客詣陳太丘宿，太丘使元方季方炊。客與太丘論議，二人進火，俱委而竊聽。炊忘箸箒，飯落釜中。太丘問：「炊何不餽？」元方季方長跪曰：「大人與客語，乃俱竊聽。炊忘箸箒，飯今成糜。」太丘曰：「爾頗有所識不？」對曰：「仿佛志之。」二子俱說，更相易奪，言無遺失。太丘曰：「如此，但糜自可，何必飯也。」

○箒，籠也。○餽，飯氣流也。

何晏七歲，明惠。○若神，魏武奇愛之。因晏在宮內，○欲以爲子。晏乃畫地令方，自處其中。人問其故，答曰：「何氏之廬也。」魏武知之，卽遣還。

○惠，與慧通。○晏之父蚤亡。曹操爲司空時，納晏母，晏隨母在宮。

晉明帝數歲，坐元帝鄰上。有人從長安○來，元帝問洛下○消息，潛然流涕。

明帝問『何以致泣？』具以東渡意告之。因問明帝『汝意謂長安何如日遠？』答曰『日遠。不聞人從日邊來，居然可知。』元帝異之。明日，集羣臣宴會，告以此意，更重問之。乃答曰『日近。』元帝失色曰『爾何故異昨日之言邪？』答曰『舉目見日，不見長安。』

○即今陝西長安縣。 ○即洛陽。 ○因中朝傾覆，乃國於江東也。

桓宣武薨，桓南郡年五歲。服始除，桓車騎○與送故文武別。因指語南郡，『此皆汝家故吏佐。』玄應聲慟哭，酸感傍人。車騎每自目己坐曰『靈寶○成人，當以此坐還之。』鞠○愛過於所生。

○晉桓沖，字玄叔，大司馬桓溫之弟。累遷車騎將軍，都督七州諸軍事。 ○桓玄小字靈寶。 ○養也。

豪爽第十三

王處仲世許高尙之目。○嘗荒恣於色，體爲之敝。左右諫之，處仲曰：『吾乃不覺爾，如此者甚易耳。』乃閉後閣，驅諸婢妾數十人出路，任其所之。時人嘆焉！

○王敦性簡脫，口不言財。

王處仲每酒後輒詠『老驥伏櫪，志在千里。烈士暮年，壯心不已。』以如意○打唾壺，壺口盡缺。

○魏武帝樂府詩之四句也。

○如意出於印度，其端作手指形，亦有作心字形者。以骨角竹木

玉石鋼鐵等爲之，長三尺許。記文於上，以備遺忘。兼有我國蚤杖及笏之用。近世仿造如意，以爲玩具。長不過一二尺，其端改作芝形雲形。

桓公讀高士傳，○至於陵○仲子○便擲去，曰：『誰能作此溪刻○自處。』

○此皇甫謚所撰之高士傳。○於陵，戰國齊邑，漢置縣，劉宋廢。故城在山東長山縣西。城西有

長白山，卽陳仲子夫婦隱居之處。○陳仲子，字子終，齊相齊戴之弟。以兄之祿與室爲不義，辟

兄離母，處於於陵。○溪，與谿通，山瀆無所通者，刻削也。謂胸襟閉塞，意見褊狹也。

王司州○在謝公坐，詠『入不言兮出不辭，乘回風兮載靈旗。』語人云：『當爾時覺一坐無人。』

○卽王胡之。○此離騷九歌少司命之辭。首句言神往來奄忽，入不語言，出不決辭，其志難知也。次句言司命之去，乘風載雲，其形貌不可得見。

容止第十四

魏武將見匈奴，使自以形陋，不足雄遠國。使崔季珪代，帝自捉刀立牀頭。既畢，令問謀。問曰：「魏王何如？」匈奴使答曰：「魏王雅望非常，然牀頭捉刀人，此乃英雄也。」魏武聞之，追殺此使。

○匈奴爲北狄之一族，秦漢時最盛，領有今內外蒙古之地。後分南北，北匈奴爲漢竇憲所破，遠走西方。南匈奴歸漢，雜居各山西省之北部。魏時分爲五部。○曹操姿貌短小。○魏崔琰，字

季珪，清河人。眉目疎朗，鬚長四尺，甚有威重。○伺敵間隙報告消息之人曰間諜。○草之精

秀者爲英，獸之拔羣者爲雄。

何平叔美姿儀，面至白。魏明帝疑其傅粉，正夏月，與熱湯甃。既瞰，大汗出，以朱衣自拭，色轉皎然。

王夷甫容貌整麗，妙於談玄。恆捉白玉柄麈尾，與手都無分別。

潘安仁夏侯湛並有美容，喜同行，時人謂之「連璧」。

有人語王戎曰：「嵇延祖○卓卓○如野鶴之在雞羣。」答曰：「君未見其父○耳。」

○即嵇紹。○特立貌。○嵇康長七尺八寸，龍章鳳姿，天質自然。

裴令公有儁○容儀。脫冠冕，麤服亂頭皆好。時人以爲「玉人」。見者曰：「見裴叔則如玉山上行，光映照人。」

○儁，卓特也。

驃騎王武子是衛玠之舅，儁爽有風姿。見玠輒歎曰：「珠玉在側，覺我形穢。」有人詣王太尉，遇安豐大將軍丞相在坐。往別屋，見季胤○平子。還語人曰：「今日之行，觸目見琳○琅○珠玉。」

○晉王嗣，字季胤，琅琊人。王衍之弟，仕至修武令。○美石也。○琅玕，似珠者。

王大將軍稱『太尉處衆人中，似珠玉在瓦石間。』

王右軍見杜弘治，歎曰：『面如凝脂，眼如點漆，此神仙中人。時人有稱王

長史形者，蔡公曰：『恨諸人不見杜弘治耳。』

○晉杜乂，字弘治，京兆人。仕丹陽丞。蚤卒。○即蔡謨。

劉尹道桓公『鬢如反猬，皮，眉如紫石稜。自是孫仲謀。』司馬宣王一流人。』時人目王右軍『飄如遊雲，矯若驚龍。』

○猬，本作羆。似豪豬而小。○吳孫權字仲謀，據有江東，稱帝於建業，在位三十一年。

王長史嘗病，親疎不通。林公來，守門人遽啓之曰：『一異人在門，不敢不啟。』

王笑曰：『此必林公。』

海西時，諸公每朝，朝堂猶暗。唯會稽王來，軒軒如朝霞舉。』

○晉廢帝，名奕，字延齡，成帝之子。在位五年，桓溫廢帝爲東海王。簡文帝咸安二年，降封海西縣

公。○高舉貌。

有人歎○王恭形茂○者，云『濯濯○如春月柳。』

○稱美曰歎。○茂，美也。○濯濯，肥澤貌。

自新第十五

周處○年少時，兇彊俠氣，爲鄉里所患。又義興水中有蛟，山中有遼跡虎，○並皆暴犯百姓。義興人謂爲三橫，而處尤劇。○或說處殺虎斬蛟，實冀三橫唯餘其一。處卽刺殺虎，又入水擊蛟。蛟或浮或沒，行數十里，處與之俱。經三日三夜，鄉里皆謂已死，更相慶。竟殺蛟而出，聞里人相慶，始知爲人情所患，有自改意。乃自吳尋二陸。平原○不在，正見清河，○具以情告。并云：「欲自修改，而年已蹉跎，○終無所成。」清河曰：「古人貴朝聞夕死，○况君前途尙可。且人患志之不立，亦何憂令名不彰邪。」處遂改勵，終爲忠臣孝子。

○晉周處，字子隱，陽羨人。仕爲御史中丞。氏人齊萬年反，處力戰，弦絕矢盡而沒。○梁劉孝標

注，引孔氏志怪曰：「邪足虎。」

○劇，甚也。

○平原內史陸機也。

○清河內史陸雲也。

○

蹉跎，失時也。④論語里仁爲美。子曰：朝聞道，夕死可矣。宋朱熹云：「道者，事物當然之理。苟

得聞之，則生順死安，無復遺恨矣。」

戴淵○少時遊俠，不治行檢，嘗在江淮間攻掠商旅。陸機赴假還洛，輜重甚盛。淵使少年掠劫。淵在岸上，據胡牀。○指麾左右，皆得其宜。淵旣神姿峯穎，雖處鄙事，神氣猶異。機於船屋上遙謂之曰：「卿才如此，亦復作劫邪？」淵便泣涕，投劍歸機。辭厲○非常。機彌重之。定交，作筆薦焉。⑤過江，仕至征西將軍。

○晉戴淵，字若思，廣陵人，元帝之忠臣也。王敦之參軍呂猗，說敦收淵而害之。○胡牀，施轉關以交足，穿繩纏以容坐。轉縮須臾，重不數斤。○厲，嚴肅也。⑤機薦淵於趙王倫。

企羨 第十六

王右軍得人以蘭亭集序。○方金谷詩序。○又以已敵石崇。○甚有欣色。

○晉穆帝永和九年三月上巳日，王羲之與謝安、孫綽等，集於會稽山陰之蘭亭。修禊賦詩，羲之作序紀其事，以蠶繭紙鼠鬚筆書之。○晉惠帝元康六年，石崇、蘇紹等，在河南縣界金谷澗中。

崇之別廬，共送征西大將軍祭酒王嗣還長安。游宴賦詩，其詩序為石崇所作。○石崇，字季倫，

小名齊奴，南皮人。司徒石苞之子。崇為荊州刺史時，劫遠使商客，致富不貲。

王司州先為庾公記室參軍，後取殷浩為長史，始到，庾公欲遣王使下都。○

王自啓求住。曰：『下官希見盛德，淵源始至，猶貪與少日周旋。』○

○下都，東下入都也。○周旋，相追逐也。

郗嘉賓得人以已比苻堅，大喜。

孟昶○未達時，家在京口。嘗見王恭乘高輿，被鶴氅裘。于時微雪，昶於籬間窺之。歎曰：『此真神仙中人。』

○晉孟昶，字彥達，平昌人。中護軍孟襲之子，仕至丹陽尹。

傷逝第十七

王仲宣○好驢鳴，既葬，文帝臨其喪。顧語同遊曰：『王好驢鳴，可各作一聲以送之。』赴客皆一作驢鳴。

○魏王粲，字仲宣，山陽人。祖襲，父暢，皆爲漢三公。

孫子荆以有才少所推服，唯雅敬王武子。武子喪，時名士無不至者。子荆後來，臨屍慟哭，賓客莫不垂涕。哭畢，向靈牀曰：『卿常好我作驢鳴，今我爲卿作。』體似真聲，賓客皆笑。孫舉頭曰：『使君輩存，令此人死。』

有人哭和長輿曰：『峨峨○若千丈松崩。』

○峨峨，高貌。

衛洗馬以永嘉六年喪，○謝鯤哭之，感動路人。咸和中，○丞相王公教○曰：

『衛洗馬當改葬。此君風流名士，海內所瞻。可修^②薄祭，以敦舊好。』

○衛玠亡於晉懷帝永嘉六年六月二十日，葬於南昌。○晉成帝時也。○教，諭告之詞也。

②修，飭也。整備也。

顧彥先○平生好琴，及喪，家人常以琴置靈牀上。張季鷹○往哭之，不勝其慟。遂徑上牀鼓琴，作數曲竟。撫琴曰：『顧彥先，願復賞此不！』因又大慟，遂不執孝子手而出。

○即顧榮。○晉張翰，字季鷹，吳大鴻臚張儉之子。齊王辟爲東曹掾，以疾歸，終於家。

庾亮兒○遭蘇峻難，遇害。諸葛道明○女○爲庾兒婦，既寡，將改適，^④與亮書及之。亮答曰：『賢女尙少，故其宜也。感念亡兒，若在初沒。』

○即庾會，小字阿恭。○晉諸葛恢，字道明，琅邪人。累遷尙書令。○名文虎。○改嫁江彪也。

庾文康亡，何揚州○臨葬云：『埋玉樹箸土中，使人情何能已已。』

○即何也。

戴公見林法師墓，○曰：『德音未遠，而拱○木已積。冀神理縣縣，○不與氣連俱盡耳。』

○支遁歿於晉廢帝太和元年，葬於剡之石城山。

○兩手所圍曰拱。

○縣縣，長不絕也。

王子猷子敬俱病篤，而子敬先亡。○子猷問左右：『何以都不聞消息？○此已喪矣。』語時了不悲，便索輿來奔喪，都不哭。子敬素好琴，便徑入坐靈牀上，取子敬琴彈，弦既不調，擲地云：『子敬子敬，人琴俱亡。』因慟絕良久，月餘亦卒。

○王獻之卒於晉孝武帝太元十三年。

○謂音信也。消謂減，息謂增。人事惟有吉凶善惡，故稱

音信爲消息。

樓逸第十八

嵇康遊於汲郡。○山中遇道士孫登。○遂與之遊。康臨去，登曰：『君才則高矣，保身之道不足。』

○即今河南汲縣。○魏孫登，字公和，不知何許人。無家，住於汲郡北山土窟。

山公將去，選曹欲舉嵇康。○康與書告絕。○

○山濤舉嵇康自代也。○康作絕交書，以有必不堪者七，甚不可者二，答之。

何驃騎弟○以高情避世，而驃騎勸之令仕。答曰：『予弟五之名，何必減驃騎。』

○晉何準，字幼道，廬江人。何充之第五弟也。

阮光祿在東山，蕭然無事，常內足於懷。有人以問王右軍，右軍曰：『此君近

不驚寵辱。○雖古之沈冥，○何以過此。』

○老子曰：『寵辱若驚，得之若驚，失之若驚。』 ○沈冥，猶玄寂，泯然無迹之貌。

孟萬年○及弟少孤，○居武昌陽新縣。○萬年遊宦，有盛名當世。少孤未嘗出京邑，人士思欲見之，乃遣信報少孤云：『兄病篤。』狼狽至都，時賢見之者，莫不嗟重。因相謂曰：『少孤如此，萬年可死。』

○即孟嘉。 ○孟陋，字少孤，終身不仕。 ○故城在今湖北陽新縣西南六十里。

戴安道既厲操東山，而其兄○欲建式遏○之功。謝太傅曰：『卿兄弟志業，何其太殊。』戴曰：『下官不堪其憂，家弟不改其樂。』

○晉戴逵，字安丘，譙國人。以武勇顯，封廣陵侯。仕至大司農。 ○詩民勞五章，每章皆有式遏寇虐句。式，用也。遏，止也。寇虐，大惡也。止絕不為害民之事也。

范宣未嘗入公門，韓康伯與同載。遂誘俱入郡，范便於車後趨下。

許掾好遊山水，而體便登陟。時人云：『許非徒有勝情，實有濟勝之具。』

盡。』

郗尚書○與謝居士○善，常稱『謝慶緒識見雖不絕人，可以累心處都

○晉郗恢，字道胤，高平人。北中郎將郗曇之子。自太子左率，擢爲雍州刺史。○謝敷，字慶緒，會

稽人。崇信釋氏，以長齋供養爲業。

賢媛第十九

陳嬰○者，東陽○人。少修德行，箸稱鄉黨。秦末大亂，東陽人欲奉嬰爲主。母曰：『不可。自我爲汝家婦，少見貧賤，一旦富貴不祥。不如以兵屬人，事成，少受其利。不成，禍有所歸。』

○陳嬰故東陽令史，後以兵屬項梁，梁以嬰爲上柱國。○故城在今安徽天長縣西北。

漢元帝宮人既多，乃令畫工圖之。欲有呼者，輒披圖召之。其中常者，皆行貨賂。王明君○姿容甚麗，志不苟求，工遂毀爲其狀。後匈奴來和，求美女於漢帝。○帝以明君充行，既召見而惜之。但名字已去，不欲中改，於是遂行。

○王嬙，字昭君，晉時避司馬文王諱，稱爲明君。○元帝竟寧元年，呼韓邪單于來朝，自言『願

增漢氏以自親。』

漢成帝○幸趙飛燕，○飛燕讒班婕妤○祝詛。○於是考問，辭曰：「妾聞死
生有命，富貴在天。○修善尙不蒙福，爲邪欲以何望。若鬼神有知，不受邪佞之訴。
若其無知，訴之何益。故不爲也。」

○漢成帝，名驁，元帝之子，在位二十六年。

○趙飛燕，漢成帝宮人，初學歌舞，以體輕號曰飛燕。

先爲婕妤，許后廢，立爲后。

○班婕妤，馮門人，選入宮，立爲婕妤。後供養太后於長信宮。○祝

音畫。以言告神謂之祝，請神加殃謂之詛。

○論語顏淵篇，子夏述聞於夫子之言也。

趙母○嫁女，女臨去，敕之曰：「慎勿爲好。」女曰：「不爲好，可爲惡邪？」母
曰：「好尙不可爲，其況惡乎？」

○三國時，吳桐鄉令，東郡廣陸妻。潁川趙氏女也。

許允○婦，是阮衛尉○女，德如○妹，奇醜。交禮竟，允無復入理，家人深以爲
憂。會允有客至，婦令婢視之，還答曰：「是桓郎。」桓郎者，桓範○也。婦云：「無憂，
桓必勸入。」桓果語許云：「阮家旣嫁醜女與卿，故當有意，卿宜察之。」許便回

入內，既見婦，即欲出。婦料其此出無復入理，便捉裾停之。許因謂曰：『婦有四德，卿有其幾？』婦曰：『新婦所乏唯容爾。然士有百行，君有幾？』許云：『皆備。』婦曰：『夫百行以德爲首，君好色不好德，何謂皆備？』允有慚色，遂相敬重。

○魏許允，字士宗，高陽人。仕至領軍將軍。

○阮共，字伯彥，尉氏人。仕魏，至衛尉卿。

○阮侃，字

德如，共之少子，仕至河內太守。

○魏桓範，字允明，沛郡人。仕至大司農。

○班昭女誠云：『女

有四行。一曰婦德，二曰婦言，三曰婦容，四曰婦功。』

○詩衛風氓第三章，鄭箋云：『士有百行，

可以功過相除。』

許允爲吏部郎，多用其鄉里，魏明帝遣虎賁收之。其婦出誠允曰：『明主可以理奪，難以情求。』既至，帝覈問之。允對曰：『舉爾所知，臣之鄉人，臣所知也。陛下檢校，爲稱職與不，若不稱職，臣受其罪。』既檢校，皆官得其人，於是乃釋。允衣服敗壞，詔賜新衣。初允被收，舉家號哭，阮新婦自若。云：『勿憂，尋還。』作粟粥待，頃之允至。

○虎賁，官名。言如猛虎之奔，狀其勇奮也。冠插兩鵝毛，主宿衛。○論語子路篇，仲弓問「焉知

賢才而舉之？」孔子告之曰：「舉爾所知。」○檢校，猶言查核也。

許允爲晉景王所誅，門生走入告其婦。婦正在機中，神色不變，曰：「蚤知爾耳。」門人欲藏其兒，婦曰：「無豫諸兒事。」後徙居墓所，景王遣鍾會看之。若才流及父，當收。兒以咨母，母曰：「汝等雖佳，才具不多，率胸懷與語，便無所憂。不須極哀，會止便止，又可少問朝事。」兒從之，會反，以狀對，卒免。

○許允爲鎮北將軍，有司奏允前擅以廚錢數乞諸俳及其官屬，滅死徙邊，道死。○允之爲鎮

北，喜謂其妻曰：「吾知免矣。」妻曰：「禍見於此，何免之有？」○允長子名奇，字子太，後仕至

尙書祠部郎，次子名猛，字子豹，後爲幽州刺史。

王經○少貧苦，仕至二千石。○母語之曰：「汝本寒家子，仕至二千石，此可
以止乎？」經不能用。爲尙書，助魏不忠於晉，被收。○涕泣辭母曰：「不從母敕，以
至今日。」母都無憾容，語之曰：「爲子則孝，爲臣則忠。有孝有忠，何負吾邪？」

○王經，字彥緯，又字承宗，清河人。仕魏爲尚書。○漢時，內有九卿郎將，外至郡守尉，皆秩二千

石。○魏帝曹髦將自出討司馬昭，經諫髦不聽。王沈、王業馳告昭，經以正直不出，遂被昭殺之。

山公與嵇阮○一面契若金蘭。○山妻韓氏，覺公與二人異於常交，問公，公

曰：『我當年可以爲友者，唯此二生耳。』妻曰：『負羈之妻，亦親觀狐趙。』意欲

窺之，可乎？他日二人來，妻勸公止之宿，具酒肉。夜穿墉，以視之，達旦忘反。公

入，曰：『二人何如？』妻曰：『君才致殊不如，正當以識度相友耳。』公曰：『伊輩

亦常以我度爲勝。』

○嵇康阮籍也。籍，字嗣宗，尉氏人。仕魏，官至步兵校尉。○易繫辭：『二人同心，其利斷金。同心

之言，其臭如蘭。』○春秋左氏傳魯僖公二十三年，狐偃趙衰從晉公子重耳過曹，僖負羈之

妻曰：『吾觀晉公子之從者，皆足以相國。』○堂中北牆謂之墉。

王渾○妻鍾氏，○生女令淑。武子爲妹求簡美對而未得，有兵家子，有雋才，

欲以妹妻之。乃白母，曰：『誠是才者，其地可遺。』然要令我見。武子乃令兵兒

與羣小雜處，使母帷中察之。既而母謂武子曰：『如此衣形者，是汝所擬者非邪？』武子曰：『是也。』母曰：『此才足以拔羣。』然地寒，不有長年，不得申其才用。觀其形骨，必不壽，不可與婚。』武子從之，兵兒數年果亡。

○王渾見賞譽第八上。○鍾夫人，名琰之，太傅鍾繇之孫。○言可勿論其地位也。○超拔乎衆羣之中也。

王汝南○少無婚，自求郝普○女。司空○以其癡，○會無婚處，任其意，遂許之。既婚，果有令姿淑德。生東海，○遂爲王氏母儀。或問汝南『何以知之？』曰：『嘗見井上取水，舉動容止不失常，未嘗忤觀，以此知之。』

○卽王湛。○晉郝普，字道匡，太原人。仕至洛陽太守。○魏王昶，字文舒，仕至司空。○見賞譽第八。○卽王承。

王司徒婦鍾氏女，太傅曾孫，亦有俊才女德。鍾郝爲姊妹，○雅相親重。鍾不以貴陵郝，郝亦不以賤下鍾。東海家內則郝夫人之法，京陵家內範鍾夫人之禮。

○姊妹，妯娌也。

陶公少有大志，家酷貧，與母湛氏同居。同郡范逵素知名，舉孝廉，投侃宿。于時冰雪積日，侃室如懸罄，而逵馬僕甚多，侃母湛氏語侃曰：「汝但出外留客，吾自爲計。」湛頭髮委地，下爲二髮，賣得數斛米，斫諸屋柱，悉割半爲薪。剉諸薦，以爲馬草。日夕遂設精食，從者皆無所乏。逵既歎其才辯，又深愧其厚意。明旦去，侃追送不已，且百里許。逵曰：「路已遠，君宜還。」侃猶不返。逵曰：「卿可去矣，至洛陽，當相爲美談。」侃迺返。逵及洛，遂稱之於羊曄。願榮諸人，大獲美譽。

○侃，父丹，取新淦 湛氏女，生侃。○晉 范逵，鄱陽人。史書無逵之他事蹟，而逵能結交當世名流。

陶公且賴以顯達，逵必未爲官而早卒也。○春秋 左氏傳僖公二十六年，杜注云：「居室而資糧縣罄。」

○下，剪下也。○髮，益髮也。言人髮少，聚他人髮益之也。○剉，斬截也。○薦，臥

席也。○羊曄，侃州里也。晉書作楊曄，豫章國郎中令，後爲十郡中正。

陶公少時作魚梁吏，嘗以坩餼餉母。母封餼付使，反書責侃曰：『汝爲吏，以官物見餉，非唯不益，乃增吾憂。』

○管取魚之梁之吏也。○坩，土器。如缸甕之類。餼，同餼。乾魚臘也。坩餼，藏餼於坩也。

桓宣武平蜀，○以李勢○妹爲妾。甚有寵，常著齋○後。主○始不知，既聞，與數十婢拔白刃襲之。正值李梳頭，髮委藉地，膚色玉曜，不爲動容。徐曰：『國破家亡，無心至此。今日若能見殺，乃是本懷。』主慚而退。

○晉穆帝永和三年，桓溫伐蜀，取之。○李勢，字子仁，身長七尺九寸，腰帶十四圍，蜀李壽之長

子也。壽死，勢嗣僞位。桓溫率水軍直指成都，勢兵敗歸降，遷之揚州。○燕居之室曰齋。○溫

尚明帝女南康長公主。

桓車騎不好簪新衣。浴後，婦○故送新衣與。車騎大怒，催使持去。婦更持還，傳語云：『衣不經新，何由而故。』桓公大笑簪之。

○桓沖婦，瑛邪王恬女，字女宗。

王右軍郗夫人謂二弟司空○中郎○曰：『王家見二謝，○傾筐倒屣。○見汝輩來，平平爾。汝可無煩復往。』

○晉郗愔，字方回，郗鑒之子。仕至司空，謚曰文穆。

○郗鑒，字重淵，郗愔之弟。累遷丹陽尹，北中

郎將，徐亮二州刺史。

○謝安，謝萬也。

○屣，所以藏食物者。

郗嘉賓喪，婦○兄弟欲迎妹還，終不肯歸。曰：『生縱不得與郗郎同室，死寧不同穴。』

○郗超，婦，汝南周門女，名馬頭。

術解 第二十一

荀勗嘗在晉武帝坐上，食筍進飯。謂在坐人曰：「此是勞薪炊也。」坐者未之信，密遣問之，實用故車腳。

人有相羊祜○父墓，「後應出受命君。」祜惡其言，遂掘斷墓後以壞其勢。相者立視之曰：「猶應出折臂三公。」俄而祜墜馬折臂，○位果至公。

○管羊祜，字叔子，南城人。上黨太守羊衡之子，官至征西大將軍。○祜爲襄陽都督時，因盤馬落地，遂折臂。

晉明帝解占塚宅。聞郭璞○爲人葬，帝微服往看。因問主人「何以葬龍角？此法當滅族。」主人曰：「郭云：「此葬龍耳。不出三年，當致天子。」」帝問：「爲是出天子邪？」答曰：「非出天子，能致天子問耳。」

○郭璞，字景純，河東人。詞賦爲東晉之冠，妙於陰陽算歷，洞五行天文卜筮之術。爲王敦記室參軍，敦謀逆，爲敦所害。

王丞相令郭璞試作一卦。卦成，郭意色甚惡。云：『公有震厄。』王問：『有可消伏？』理不。郭曰：『命駕西出數里，得一柏樹，截斷如公長，置牀上常寢處，災可消矣。』王從其語。數日中，果震柏粉碎。子弟皆稱慶。大將軍云：『君乃復委罪於樹木。』

○消，滅也。伏，匿藏也。

桓公有主簿善別酒，有酒輒令先嘗。好者謂『青州』從事。惡者謂『平原』督郵。『青州有齊郡，平原有鬲縣。從事言到臆，督郵言在鬲。』上住。

○青州，統郡國六。齊國，濟南郡，樂安國，城陽郡，東萊國，長廣郡。今山東之膠東道及濟南道東境皆是。

○冀州平原國統平原，高唐，在平，博平，聊城，安德，西平昌，高九縣。今山東舊武定府及濟南府之西部，北自樂陵，南至長清，皆是。

○官名。郡守之佐吏，主督察屬縣之愆尤者也。鄧尤。

同音假借。④隔，與膈通。在胸腔腹腔之間。

殷中軍妙解經○脈，中年都廢。有常所給使，忽叩頭流血。浩問其故，云：『有死事。』終不可○說。詰問良久，乃云：『小人母垂百歲，抱疾來久。若蒙官一脈，便有活理，訖就屠戮無恨。』浩感其至性，遂令昇來。爲診脈處方，始服一劑湯便愈。○於是悉焚經方。④

○脈之所行爲經。醫學舊說，以十二經分配臟腑。○可，肯也。○病差謂之愈。④漢書藝文志，有經方十一家。凡言藥劑療治之法，皆屬之，今其書多不傳。

巧藝 第二十一

陵雲臺○樓觀精巧。先稱平衆木輕重，然後造構，乃無錙銖○相負。○揭○
 臺雖高峻，○常隨風搖動，而終無傾倒之理。魏明帝登臺，懼其勢危，別以大材扶
 持之，樓即積壞。論者謂「輕重力偏故也。」

○魏文帝築。○六銖爲鎰。二十四銖爲兩。○負，猶失也。○揭，高貌。○樓棟至地十三丈
 五尺七寸五分。

韋仲將○能書。○魏明帝起殿，欲安榜，使仲將登梯題之。○既下，頭鬢皓然。
 因敕兒孫「勿復學書。」

○韋誕，字仲將，京兆人。仕至光祿大夫。○誕善楷書，魏宮觀多誕所題。○明帝立陵霄觀，去
 地二十五丈。誤先釘榜，使誕就題，誕甚危懼。

鍾會是荀濟北○從舅，二人情好不協。荀有寶劍，可直百萬，常在母鍾夫人許。會善書，學荀手跡，作書與母取劍，仍竊去不還。荀勗知是鍾而無由得也，思所以報之。後鍾兄弟○以千萬起一宅，始成，甚精麗，未得移住。荀極善畫，乃潛往畫鍾門堂，作太傅○形象。衣冠狀貌如平生。二鍾入門，便大感慟，宅遂空廢。

○即荀勗。 ○鍾毓鍾會也。 ○即鍾繇。

羊長和○博學工書，能騎射，善圍棋。諸羊後多知書，○而射弈餘藝莫逮。

○晉羊忱，字長和，太山人。漢太尉羊續之曾孫。歷太傅長史，揚州刺史，遷侍中。晉懷帝永嘉五年，遭亂被害。 ○太山羊氏有羊欣長於草隸，羊固善草行。

戴安道就范宣學。視范所爲，范讀書，亦讀書。范抄書，亦抄書。唯獨好畫，范以爲無用，不宜勞思於此。戴乃畫南都賦○圖，范看畢咨嗟，甚以爲有益，始重畫。

○南都賦，漢尚書張衡作。南陽，漢之舊都。在東京之南，故曰南都。

王中郎以圍棋是坐隱。支公以圍棋爲手談。

顧長康○畫謝幼輿，在巖石裏。人問其所以。顧曰：『謝云：「一丘一壑，自謂過之。」此子宜置丘壑中。』

○顧愷之，字長康，小字虎頭，晉陵人。晉安帝義熙初，為散騎常侍。俗傳「顧愷之有三絕：才絕，畫絕，癡絕。」○見品藻第九。

顧長康畫人，或數年不點目精。人問其故。顧曰：『四體○妍蚩，本無關於妙處。傳神寫照，正在阿堵中。』

○四體，二手二足也。

顧長康道『畫手揮五弦易，目送歸鴻難。』○

○目送歸鴻，手揮五絃，乃嵇康贈秀才入軍詩也。愷之每重嵇康四言詩，因為之作圖。

禮 第二十二

元帝正會，引王丞相登御牀。王公固辭，中宗○引之彌苦。王公曰：『使太陽與萬物同輝，臣下何以瞻仰。』

○中宗，晉元帝廟號。

王珣郗超並有奇才，爲大司馬所眷拔。珣爲主簿，超爲記室參軍。超爲人多鬚，珣狀短小。於時○荊州爲之語曰：『鬚○參軍，短主簿。能令公喜，能令公怒。』

○桓溫爲荊州刺史之時。○類鬚也。

任誕 第二十三

阮籍遭母喪。在晉文王坐，進酒肉。司隸何曾亦在坐，曰：「明公方以孝治天下，而阮籍以重喪顯於公坐飲酒食肉，宜流。」之海外，以正風教。」文王曰：「嗣宗毀頓如此，君不能共憂之，何謂？」且有疾而飲酒食肉，固喪禮也。」籍飲噉不輟，神色自若。

○何曾，字顯考，陽夏人。仕晉，至太宰。

○流者，移其居處，若水流然。

○見禮記曲禮上。

劉伶病酒，渴甚，從婦求酒。婦捐酒毀器，涕泣諫曰：「君飲太過，非攝生之道，必宜斷之。」伶曰：「甚善，我不能自禁，唯當祝鬼神，自誓斷之耳，便可具酒肉。」婦曰：「敬聞命。」供酒肉於神前，請伶祝誓。伶跪而祝曰：「天生劉伶，以酒爲名。一飲一斛，五斗解醒。婦人之言，慎不可聽。」便飲酒進肉，隗然已醉矣。

○劉伶，字伯倫，沛國人。仕晉，爲建威將軍。○酒病日醒。

劉公榮○與人飲酒，雜穢非類，人或譏之。答曰：「勝公榮者，不可不與飲。不
如公榮者，亦不可不與飲。是公榮輩者，又不可不與飲。故終日共飲而醉。」

○晉劉昶，字公榮，沛國人。仕至兗州刺史。

劉伶恆縱酒放達。或脫衣裸形在屋中，人見譏之。伶曰：「我以天地爲棟宇，
屋室爲幃○衣，諸君何爲入我幃中？」

○幃，音昆。褻衣也。

阮籍嫂嘗還家，籍見與別，或譏之。○籍曰：「禮豈爲我輩設也。」

○禮記曲禮，「嫂叔不通問。」

阮公隣家婦，有美色，當壚酤酒。阮與王安豐常從婦飲酒，阮醉，便眠其婦側。
夫始殊疑之，伺察終無他意。

阮仲容○步兵○居道南，諸阮居道北。北阮皆富，南阮貧。七月七日，北阮盛

曬衣，皆紗羅錦綺。①仲容以竿挂大布犢鼻褌②於中庭，人或怪之。答曰：「未能免俗，③聊復爾耳。」

①晉阮咸，字仲容，尉氏人。與叔父阮籍齊名，仕至散騎侍郎。②卽阮籍。③綺，縠也。其文縠邪，

不順經緯之縱橫也。④犢鼻褌，形如犢鼻之短褲，僅蔽膝以上者，傭保之服也。又膝以上二寸

爲犢鼻穴，言褌之長才至此也。⑤七月七日曬衣，乃舊俗也。相傳是日暴經書及衣裳，不蠶。

裴成公①婦，王戎女。王戎晨往裴許，不通徑前。裴從牀南下，女從北下，相對作賓主，了無異色。

①裴頠爲趙王倫所害。惠帝反正，復頠官，改葬以卿禮，謚曰成。

阮宣子常步行，以百錢掛杖頭，至酒店，便獨酣暢。雖當世貴盛，不肯詣也。

張季鷹縱任不拘，時人號爲「江東步兵」。①或謂之曰：「卿乃可縱適一時，獨不爲身後名邪？」答曰：「使我有身後名，不如卽時一斛酒。」

①謂其個儻不羈，嗜酒放蕩，如步兵校尉阮籍也。

賀司空○入洛赴命，爲太孫舍人。○經吳閶門，○在船中彈琴。張季鷹本不相識，先在金閶亭。○聞弦甚清，下船就賀。因共語，便大相知說。問賀：『卿欲何之？』賀曰：『入洛赴命，正爾進路。』張曰：『吾亦有事北京。』○因路寄載，便與賀同發。初不告家，家追問迺知。

○晉賀循，字彥先，山陰人。元帝太興二年，贈司空。○晉書賀循傳，作『太子舍人』。○閶門，

姑蘇城門名。至今仍呼爲閶門。○金閶亭，又名金昌亭，原名曰金傷亭。傍川帶河，相傳漢朱買

臣爲會稽內史，逢其迎吏，逆旅北舍，與買臣爭席，買臣出其印綬，羣吏漸服自裁。因事建亭，號曰

金傷。劉宋時，徐羨之弑宋廢帝於此亭。○當時南方之人，稱洛陽爲北京。

祖車騎○過江時，公私儉薄，無好服玩。王庾○諸公共就祖，忽見裘袍重疊，珍飾盈列。諸公怪問之，祖曰：『昨夜復南塘一出。』祖於時恆自使健兒鼓行劫鈔。在事之人，亦容而不問。

○晉祖逖，字士雅，范陽人。元帝時，爲豫州刺史，贈車騎將軍。○王導庾亮也。

鴻臚卿孔羣○好飲酒。王丞相語云：「卿何爲恆飲酒？不見酒家覆甌布，日月糜爛。」羣曰：「不爾，不見糟肉乃更堪久。」羣嘗書與親舊，「今年田得七百斛秣米，不了麩糞事。」

○晉孔羣，字敬休，山陰人。仕至御史中丞。

蘇峻亂，○諸庾逃散。庾冰時爲吳郡，單身奔亡。民吏皆去，唯郡卒獨以小船載冰。出錢塘○口，籩篠○覆之。時峻賞募覓冰，屬所在搜檢甚急。卒捨船市渚，○因飲酒醉還。舞棹向船曰：「何處覓庾吳郡，此中便是。」冰大惶怖，然不敢動。監司○見船小裝狹，謂卒狂醉，都不復疑。自送過瀨江，○寄山陰。○魏家得免。後事平，冰欲報卒，適其所願。卒曰：「出自廝○下，不願名器。少苦執鞭，恆患不得快飲酒。使其酒足餘年畢矣，無所復須。」冰爲起大舍，市奴婢。使門內有百斛酒，終其身。時謂「此卒非唯有智，且亦達生。」

○蘇峻破建康，在晉成帝咸和三年。

○錢塘縣境之江面爲錢塘江，浙江之下游也。

○籩篠，

竊竹席也。

④水岐曰渚。

⑤司監察之官吏也。

⑥溯，與浙通。浙者，折也。蓋取其潮出海曲折

而倒流也。

⑦山陰爲浙江省之縣名，今併入紹興縣。

⑧廝，折薪養馬者。

殷洪喬○作豫章郡。臨去，都下人因附百許函書。既至石頭，悉擲水中。因祝

曰：『沈者自沈，浮者自浮。殷洪喬不能作致書郵。』

○晉殷羨，字洪喬，陳郡人。

王長史謝仁祖同爲王公掾。長史云：『謝掾能作異舞。』謝便起舞，神意

甚暇。王公熟視，謂客曰：『使人思安豐。』

○謝尙工鴿鶴舞。

王子猷詣郗雍州，○雍州在內。見有麤毳○云：『阿乞那得此物。』令左右

送還家，郗出覓之。王曰：『向有大力者負之而趨。』郗無忤色。

○卽郗恢。小字阿乞。

○毳乃方字之訛。毳毼，一名毳毼，毛席也。以羊之細毛織成。

張湛○好於齋前種松柏。時袁山松○出遊，每好令左右作挽歌。時人謂

『張屋下陳屍，袁道上行殯。』

○晉張湛，字處度，小字鱗，高平人。仕至中書郎。○袁山松，陳郡人。歷祕書監，吳國內史。

王子猷嘗暫寄人空宅住，便令種竹。或問『暫住何煩爾？』王嘯詠良久，直指竹曰『何可一日無此君！』

王子猷居山陰。夜大雪，眠覺開室，命酌酒。四望皎然，因起彷徨，詠左思招隱詩。○忽憶戴安道，時戴在剡，即便夜乘小船就之。經宿方至，造門不前而返。人問其故，王曰『吾本乘興而來，興盡而返，何必見戴！』

○見文選卷二十二。

王子猷出都，尚在渚下。舊聞桓子野○善吹笛而不相識，遇桓於岸上過。王在船中，客有識之者云『是桓子野。』王便令人與相聞，云『聞君善吹笛，試爲我一奏。』桓時已貴顯，素聞王名，即便回下車，踞胡牀，爲作三調。弄畢，便上車去。客主不交一言。

○音桓伊，字叔夏，小字野王，譙國人。與謝玄共破苻堅，封永修縣侯。爲右軍將軍。

王孝伯○言『名士不必須奇才。但使常得無事，痛飲酒，熟讀離騷，○便可稱名士。』

○卽王恭。○離騷。戰國時，楚大夫屈原所作。

簡傲 第二十四

晉文王功德盛大。坐席嚴敬，擬於王者。唯阮籍在坐，箕踞。嘯歌，酣放自若。

○箕踞者，謂曲兩脚形如箕也。

王戎弱冠詣阮籍，時劉公榮在坐。阮謂王曰：『偶有二斗美酒，當與君共飲，彼公榮者無預焉。』二人交觴酬酢，公榮遂不得一椀。而言語談戲，三人無異。或有問之者，阮答曰：『勝公榮者，不得不與飲酒。不如公榮者，不可不與飲酒。唯公榮可不與飲酒。』

○主答客曰酬，客報主人曰酢。○略變公榮之語，以戲公榮也。

鍾士季○精有才理。先不識嵇康，鍾要○於時賢儔之士，俱往尋康。康方大樹下鍛，○向子期○爲佐鼓排。○康揚槌不輟，傍若無人，移時不交一言。鍾起去，

康曰：『何所聞而來？何所見而去？』鍾曰：『聞所聞而來，見所見而去。』

○卽鍾會。○要，會也。○鍛，以金入火淬而椎之也。○卽向秀。○排，與鞞通。吹火具也。

王平子出爲荊州，○王太尉及時賢送者傾路。時庭中有大樹，上有鵲巢。平子脫衣巾，徑上樹取鵲子。涼衣拘闔樹枝，便復脫去。○得鵲子還下弄，神色自若，傍若無人。

○晉惠帝時，太尉王衍以其弟王澄爲荊州刺史。○脫去涼衣，則袒臂露胸，可謂放蕩極矣。

王子猷作桓車騎，騎兵參軍。桓問曰：『卿何署？』答曰：『不知何署，時見牽馬來，似是馬曹。』桓又問：『官有幾馬？』答曰：『不問馬，○何由知其數。』又問：『馬比死多少？』答曰：『未知生，焉知死。』

○論語鄉黨篇，廐焚。子退朝曰：『傷人乎？』不問馬。○論語先進篇，季路問死。子曰：『未知生，焉知死。』

王子敬兄弟見郗公，○躡履問訊，甚修外生。○禮及嘉賓死，皆簪高屐，儀容

輕慢命坐，皆云：『有事不暇坐。』既去，郗公慨然曰：『使嘉賓不死，鼠輩敢爾。』

○即郗愔。○晉人稱甥曰外生。王羲之為郗鑒之壻，郗倍與獻之兄弟為舅甥。○言其子郗

超若在，王氏兄弟畏其權勢，不敢如此無禮也。

王子敬自會稽經吳，聞顧辟疆○有名園。先不識主人，徑往其家。值顧方集賓友酣燕，而王遊歷既畢，指麾好惡，傍若無人。顧勃然○不堪曰：『傲主人，非禮也。以貴驕人，非道也。失此二者，不足齒人。』便驅其左右出門，王獨在輿上回轉。顧望左右，移時不至。然後令送箬門外，怡然不屑。④

○晉顧辟疆，吳郡人。歷郡功曹，平北參軍。○勃然，變色貌。○僇，鄙賤之稱。④凡遇事物，輕

視不加意曰不屑。

排調第二十五

晉文帝與二陳○共車過，喚鍾會同載，即駛車委去。比出，已遠。既至，因嘲○
之曰：『與人期行，何以遲遲，望卿遙遙。』不至。』會答曰：『矯然懿實，何必同羣。
○』帝復問會：『臯繇何如人？』答曰：『上不及堯舜，下不逮周孔，亦一時之懿
士。』

○陳騫陳泰也。泰，見方正第五。騫，東陽人。起家尚書郎，晉武帝咸寧初爲太尉，轉大司馬。○嘲，
言相調也。○鍾會之父名繇，特以遙遙戲之也。○陳騫之父名矯。司馬昭之父名懿。陳泰之
父名羣，祖名實。故會以此報之。

鍾毓爲黃門郎，有機警。在景王坐燕飲，時陳羣子玄伯，○武周○子元夏，○
同在坐共嘲毓。景王曰：『臯繇何如人？』對曰：『古之懿士。』願謂玄伯元夏曰：

『君子周而不比，^④羣而不黨。』^⑤

○卽陳泰。 ○魏武周，字伯南，沛國人。仕至光祿大夫。 ○武陵，見品藻第九。 ○見論語爲政

篇。孔安國注云：『忠信爲周，阿黨爲比。』^④見論語衛靈公篇。孔安國注云：『黨，助也。君子雖

衆，不相私助。』

嵇阮山劉 ○在竹林酣飲，王戎後往。步兵曰：『俗物已復來敗人意。』王笑

曰：『卿輩意，亦復可敗邪？』

○嵇康阮籍咸山濤劉伶也。

晉武帝問孫皓：『聞南人好作爾汝歌，頗能爲不？』皓正飲酒，因舉觴勸帝

而言曰：『昔與汝爲隣，今與汝爲臣。上汝一卮酒，令汝壽萬春。』帝悔之。

孫子荆年少時，欲隱。語王武子當枕石漱流，誤曰：『漱石枕流。』王曰：『流

可枕石可漱乎？』孫曰：『所以枕流，欲洗其耳。○所以漱石，欲礪其齒。』

○堯讓天下於許由，許由不受。乃過清冷水，以水洗其耳。

陸太尉○詣王丞相。王公食以酪，陸還遂病。明日與王牋云：『昨食酪小過，通夜委頓。民雖吳人，幾爲僞○鬼。』

○卽陸玩。○吳人謂中州人爲僞。

元帝皇子生，普賜羣臣。殷洪喬謝曰：『皇子誕育，普天同慶。臣無勳焉，而猥○頒厚賚。』中宗笑曰：『此事豈可使卿有勳邪？』

○猥，盛也。○賚，賜也。

諸葛令○王丞相共爭姓族先後。王曰：『何不言葛王而云王葛？』令曰：『譬言驢馬，不言馬驢，驢豈勝馬邪？』

○卽諸葛恢。

王丞相枕周伯仁鄰，指其腹曰：『卿此中何所有？』答曰：『此中空洞無物，然容卿輩數百人。』

于寶○向劉真長敘○其搜神記。○劉曰：『卿可謂鬼之董狐。』

○管干寶，字令升，新蔡人。元帝時，以著作郎領國史，遷散騎常侍。○敘，陳述也。○搜神記，撰

集古今靈異神祇人物變化。今之傳本，共二十卷。敘事古雅，斐然可觀。○董狐見方正第五。

康僧淵○目深而鼻高，王丞相每調之。僧淵曰：「鼻者面之山。目者面之淵。

山不高則不靈。淵不深則不清。」

○梁劉孝標疑其是胡人。

褚季野問孫盛○「卿國史○何當成？」孫云：「久應竟。在公無暇，故至今

日。」褚曰：「古人述而不作，○何必在蠶室○中。」

○晉孫盛，字安國，太原人。起家佐著作郎，累遷至祕書監，加給事中。○孫盛著晉陽秋，詞直而

理正，咸稱良史。○見論語述而篇。朱熹注云：「述，傳舊而已。作，則創始也。作非聖人不能，而述

則賢者可及。」○漢司馬遷受腐刑而著史記。腐刑者，作密室蓄火時如蠶室。

謝公在東山。朝命屢降而不動，後出為桓宣武司馬。將發新亭，○朝士咸出

瞻送。高靈○時為中丞，亦往相祖。○先時多少飲酒，因倚如醉。戲曰：「卿屢違朝

旨，高臥東山，諸人每相與言：「安石不肯出，將如蒼生何？」今亦蒼生將如卿何？」謝笑而不答。

○新亭，一名勞勞亭，亦名臨滄觀。吳時築。在今江蘇江寧縣南。東晉初，諸名士每游宴於此亭。

○晉高崧，字茂琰，小字阿靈，廣陵人。初爲何充之主簿，累遷至侍中。○出行之時，祭路神曰祖。

後遂以餞行爲祖。

王劉○每不重蔡公。二人嘗詣蔡語，良久，乃問蔡曰：「公自言何如夷甫？」
答曰：「身不如夷甫。」王劉相目而笑曰：「公何處不如？」答曰：「夷甫無君輩客。」

○王濛劉惔也。

張吳興○年八歲，齟齬，先達知其不常，故戲之曰：「君口中何爲開狗竇？」
張應聲答曰：「正使君輩從此中出入。」

○即張玄，見政事第三。○竇，穿壁爲小戶也。

范玄平○在簡文坐，談欲屈，引王長史曰：『卿助我。』王曰：『此非拔山力所能助。』

○晉范汪，字玄平，潁陽人。歷吏部尚書，徐兗二州刺史。○項羽為漢兵所圍，夜起歌曰：『力拔山兮氣蓋世。時不利兮騅不逝。』

郝隆○為桓公南蠻參軍。三月三日會，作詩，不能者罰酒三升。隆初以不能受罰，既飲，攬筆便作一句云：『姬隅躍清池。』桓問：『姬隅是何物？』答曰：『蠻名魚為姬隅。』桓公曰：『作詩何以作蠻語？』隆曰：『千里投公，始得蠻府參軍，那得不作蠻語也。』

○晉郝隆，字佐治，汲郡人。

張蒼梧○是張憑○之祖。嘗語憑父曰：『我不如汝。』憑父未解所以。蒼梧曰：『汝有佳兒。』憑時年數歲，斂手曰：『阿翁，詎○宜以子戲父。』

○張鎮，字義遠，泰安中，除蒼梧太守。討王含有功，封興道縣侯。○張憑見文學第四。○詎，猶

豈也。

王子猷詣謝萬。林公先在坐，瞻矚甚高。王曰：「若林公鬚髮竝全，神情當復勝此不？」謝曰：「脣齒相須，不可以偏亡。鬚髮何關於神明？」林公意甚惡，曰：「七尺之軀，今日委君一賢。」

郗司空拜北府。○王黃門詣郗門拜云：「應變將略，非其所長。」○驟○詠之不已。郗倉○謂嘉賓曰：「公今日拜，子猷言語不遜，深不可容。」嘉賓曰：「此是陳壽○作諸葛評，人以汝家比武侯，復何所言。」

○徐州在建康之北。王舒為徐州刺史，加北中郎將。由是有北府之號。桓溫以郗愔與徐亮有故義，遷愔領徐亮二州刺史。○見蜀志諸葛亮傳。○驟，數也。○晉郗融，字景山，小字倉。郗愔之次子。早卒。○晉陳壽，字承祚，安漢人。少舉孝廉，除著作郎。撰三國志，時人稱其善敘事，有良史之才。

劉遵祖○少為殷中軍所知，稱之於庾公。庾公甚忻然，便取為佐。既見，坐之

獨榻上與語。劉爾日殊不稱，庾小失望，遂名之爲羊公。鶴昔羊叔子有鶴善舞，嘗向客稱之。客試使驅來，氍毹而不敢舞，故稱比之。

○晉劉爰之，字遵祖，沛郡人。歷中書郎，宣城太守。○卽羊祜。○氍毹，散毛貌。

顧長康噉甘蔗先食尾。人問所以，云：「漸至佳境。」

桓南郡與殷荊州語次，因共作了語。顧愷之曰：「火燒平原無遺燎。」桓曰：「白布纏棺豎旒旒。」殷曰：「投魚深淵放飛鳥。」次復作危語。桓曰：「矛頭淅米劍頭炊。」殷曰：「百歲老翁攀枯枝。」顧曰：「井上轆轤臥嬰兒。」殷有一參軍在坐，云：「盲人騎瞎馬，夜半臨深池。」殷曰：「咄咄逼人。」仲堪眇目故也。

○浙，汰米也。○咄咄，驚怪聲也。○眇，偏盲也。

祖廣○行恆縮頭。詣桓南郡，始下車。桓曰：「天甚晴朗，祖參軍如從屋漏中來。」

○晉祖廣，字淵度，范陽人。仕至議軍長史。

世說新語 排調第二十五

一百四十七

輕詆第二十六

深公云：「人謂「庾元規名士，」胸中柴棘三斗許。」

○僧法深，不知其俗姓，蓋衣冠之胤也。

袁虎○伏滔○同在桓公府。桓公每遊燕，輒命袁伏，袁甚恥之。恆歎曰：「公之厚意，未足以榮國士。與伏滔比肩，亦何辱如之。」

○管袁宏，字彥伯，小字虎，陳郡人。初爲謝安南司馬，後自吏部郎，出爲東陽郡。○伏滔，字玄度，

平昌人。爲桓溫參軍，領大著作，掌國史。

孫長樂兄弟○就謝公宿，言至款雜。劉夫人○在壁後聽之，具聞其語。謝公明日還，問「昨客何似？」劉對曰：「亡兄門未有如此賓客。」謝深有愧色。

○孫綽與其兄孫統也。○劉楨之妹也。

孫長樂作王長史誄云：『余與夫子，交非勢利。心猶澄水。同此玄味。』王孝伯見曰：『才士不遜，亡祖何至與此人周旋。』

人問顧長康『何以不作洛生詠？』答曰：『何至作老婢聲。』

○洛下書生詠音重濁，聲如老婢。

支道林入東，見王子猷兄弟還，人問『見諸王何如？』答曰：『見一羣白頸鳥，但聞喚啞啞聲。』

假譎 第二十七

魏武行役失汲道，軍皆渴，乃令曰：『前有大梅林，饒子，甘酸可以解渴。』士卒聞之，口皆出水。乘此得及前源。

魏武常言：『人欲危己，已輒心動。』因語所親小人曰：『汝懷刃密來我側，我必說一心動，執汝使行刑。』汝但勿言，其使無他，當厚相報。』執者信焉，不以爲懼，遂斬之。此人至死不知也，左右以爲實。謀逆者挫氣矣。

魏武常云：『我眠中不可妄近。近便斫人，亦不自覺，左右宜深慎此。』後陽眠，所幸一人竊以被覆之，因便斫殺。自爾每眠，左右莫敢近者。

王右軍年減十歲時，大將軍甚愛之，恆置帳中眠。大將軍嘗先出，右軍猶未起。須臾，錢鳳入，屏人論事，都忘右軍在帳中，便言逆節之謀。右軍覺，既聞所論，

知無活理。乃剔吐汗頭面被褥，詐孰眠。敦論事造半，方意右軍未起。相與大驚曰：『不得不除之。』及開帳，乃見吐唾從橫。信其實孰眠，於是得全。於時稱其有智。

○晉錢鳳，字世儀，王敦之鑑曹參軍也。

黜免第二十八

諸葛玄在西朝，○少有清譽。爲王夷甫所重，時論亦以擬王。後爲繼母族黨所讒，誣之爲狂逆。將遠徙，友人王夷甫之徒，詣檻車與別。玄問：『朝廷何以徙我？』王曰：『言卿狂逆。』玄曰：『逆則應殺，狂何所徙？』

○晉自武帝至愍帝都洛陽，在建康之西北，故稱西朝。

桓公入蜀，至三峽，○中部伍中有得獼子者。其母緣岸哀號，行百餘里不去。遂跳上船，至便卽絕。破視其腹中，腸皆寸寸斷。公聞之怒，命黜其人。

○三峽西陵峽歸鄉峽巫峽也。

桓宣武旣廢太宰父子，○仍上表曰：『應割近情，以存遠計。若除太宰父子，可無後憂。』簡文手答表曰：『所不忍言，况過於言。』宣武又重表，辭轉苦切。簡

文更答曰：『若晉室靈^①長，明公便宜奉行此詔。如大運去矣，請避賢路。』桓公讀詔，手戰流汗，於此乃止。太宰父子，遠徙新安^②。

①晉司馬晞，字道升，元帝第四子。封武陵王，拜太宰。晞三子，縉、璉、遵。②靈，福也。③新安，郡名。

故城在今浙江淳安縣西。

殷仲文^④既素有名望，自謂『必當阿衡^⑤朝政。』忽作東陽太守，意甚不平。及之郡，至富陽^⑥，慨然嘆曰：『看此山川形勢，當復出一孫伯符^⑦。』

④晉殷仲文，字仲文，陳郡人。荊州刺史殷仲堪之從弟也。初由會稽王道子引爲驛騎參軍，後爲

桓玄諮議參軍，累遷侍中尚書。⑤阿，倚也。衡，平也。湯倚伊尹而取平，故以爲官名。⑥東陽，晉

郡名，卽清浙江之金華府。⑦縣名，漢爲富春縣，卽今浙江之富陽縣。⑧孫策，字伯符，富春人。

漢末，領其父孫堅之兵，據江東之地。

儉嗇第二十九

王戎有好李，賣之，恐人得其種，恆鑽其核。

王戎女適裴頠，貸錢數萬。女歸，戎色不說。女遽還錢，乃釋然。

衛江州○在尋陽。○有知舊人投之，都不料理，唯餉王不留行○一斤。此人

得餉，即命駕。李弘範○聞之曰：『家身刻薄，乃復驅使草木。』

○晉衛展，字道舒，安邑人。惠帝光熙初，除應揚將軍江州刺史。○晉惠帝元康元年，割揚州之

七郡荊州之三郡，合十郡。因江水之名，而置江州。永興元年，又分廬江之尋陽縣，武昌之柴桑縣，

置尋陽郡，屬江州。○王不留行，藥名也。莖高二尺許，葉如箭鏃形。春夏間，開淡紅色之花。萼爲

筒狀。子如豆，熟則黑。治金瘡，除風，久服之輕身。○梁劉孝標云：『李軌，字弘範，劉氏之甥。此應

弘度非弘範也。』

郗公大聚斂，有錢數千萬。嘉賓意甚不同。常朝且問訊，郗家法，子弟不坐。因倚語移時，遂及財貨事。郗公曰：『汝正當欲得吾錢耳。』迺開庫一日，令任意用。郗公始正謂損數百萬許。嘉賓遂一日乞與親友周旋略盡。郗公聞之，驚怪不能已已。

汰修 第三十

武帝嘗降王武子家。武子供饌，竝用瑠璃^①器。婢子百餘人，皆綾羅袴^②襪^③。以手擎^④飲食。烝菹^⑤肥美，異於常味。帝怪而問之。答曰：「以人乳飲菹。」帝甚不平，食未畢便去。王^⑥石^⑦所未知作。

①瑠璃，即流離。大秦出赤白黑黃青綠縹紺各色流離。②縹，歷衣也。③襪，婦人上衣也。

④擎，舉也。⑤菹，本作豚。豕子也。⑥晉王愷，字君夫，東海人。王肅子也。為後軍將軍，卒後諡曰醜。

⑦石崇見企羨第十六。

王君夫有牛名八百里駁，常鑿其蹄角。王武子語君夫：「我射不如卿，今指賭卿牛，以千萬對之。」君夫既恃手快，且謂駁物無有殺理，便相然可。令武子先射，武子一起便破的。卻據胡牀，叱左右：「速探牛心來。」須臾炙至，一臠。

便去。

○駭，猛獸名。能食虎豹。

○瑩，瑩之段借字。治也。

○櫛，塊切肉也。

石崇與王愷爭豪，竝窮綺麗以飾輿服。武帝愷之甥也。每助愷，嘗以一珊瑚樹，高二尺許，賜愷。枝柯扶疎，世罕其比。愷以示崇，崇視訖，以鐵如意擊之，應手而碎。愷既惋惜，又以為疾己之寶，聲色甚厲。崇曰：『不足恨，今還卿。』乃命左右悉取珊瑚樹，有三尺四尺，條幹絕世，光彩溢目者六七枚。如愷許比甚衆。愷憫然自失。

○暖海中有一種圓筒形小蟲，結合營生。其所分泌之石灰質，即為其共同之骨幹。形歧出如樹枝，故昔稱珊瑚樹，實非樹也。每產於非洲西北及地中海等處。○扶疎，繁茂也。○惘然，失意貌。

忿狷 第三十一

魏武有一妓。聲最清高，而情性酷惡。欲殺則愛才，欲置則不堪。於是選百人，一時俱教。少時果有一人聲及之，便殺惡性者。

王藍田性急。嘗食雞子，以筋刺之不得，便大怒。舉以擲地，雞子於地圓轉未止。仍下地，以屐齒碾之，又不得，曠甚。復於地取內，口中齧破，即吐之。王右軍聞而大笑曰：「使安期有此性，猶當無一豪可論。况藍田邪？」

○內，同納。

謝無奕性麤彊。以事不相得，自往數。王藍田，肆言極罵。王正色，面壁不敢動。半日，謝去，良久轉頭問左右小吏曰：「去未？」答云：「已去。」然後復坐。時人嘆其性急而能有所容。

○數，責也。

桓南郡小兒時，與諸從兄弟，各養鵝共鬪。南郡鵝每不如，甚以爲忿。迺夜往鵝欄間，取諸兄弟鵝悉殺之。既曉，家人咸以驚駭。云：『是變怪。』以白車騎，車騎曰：『無所致怪，當是南郡戲耳。』問果如之。

魏險第三十二

孝武○甚親敬王國寶○王雅○雅薦王珣於帝，帝欲見之。嘗夜與國寶及雅相對，帝微有酒色。令喚珣，垂至，已聞卒傳聲。國寶自知才出珣下，恐傾奪其寵。因曰：『王珣當今名流，陛下不宜有酒色見之，自可別詔召也。』帝然其言，心以爲忠，遂不見珣。

○見言語第二。○王國寶，平北將軍王坦之之第三子。太傅謝安之壻也。晉安帝時，參管朝權。

威震內外。遷尙書左僕射。○王雅，字茂楚，東海人。以寵幸，由侍中超授太傅尙書左僕射。

王緒○數讒殷荊州於王國寶。殷甚患之，求術於王東亭。曰：『卿但數詣王緒，往輒屏人，因論它事。如此，則二王之好離矣。』殷從之。國寶見王緒，問曰：『比與仲堪屏人何所道？』緒云：『故是常往來，無它所論。』國寶謂緒於己有隱，果

情好日疎，讒言以息。

○晉王緒，字仲業，太原人。爲會稽王從事中郎，以佞邪親幸。國寶由緒獲進。

尤悔 第三十三

魏文帝忌弟任城王○驍○壯。因在卞太后○閣共圍棋，並噉棗。文帝以毒置諸棗中，自選可食者而進。王弗悟，遂雜進之。既中毒，太后索水救之。帝預敕左右毀餅罐，太后徒跣趨井無以汲。須臾遂卒。復欲害東阿，太后曰：『汝已殺我任城，不得復殺我東阿。』

○魏任城威王彰，字子文，太祖下太后第二子也。○驍，勇捷也。○武宣下皇后，琅邪人，有母

儀德行。○即曹植。見文學第四。

王大將軍起事，丞相兄弟詣闕謝。周侯深憂諸王，始入甚有憂色。丞相呼周侯曰：『百口委卿。』周直過不應，既入，苦相存救。既釋，周大說飲酒。及出，諸王故在門。周曰：『今年殺諸賊奴，當取金印如斗大繫肘。』後。王大將軍至石頭，問丞

相曰：『周侯可爲三公不？』丞相不答。又問：『可爲尙書令不？』又不應。因云：『如此，唯當殺之耳。』復默然。逮周侯被害，丞相後知周侯救己。嘆曰：『我不殺周侯，周侯由我而死，幽冥中負此人。』

○晉中部變曲處，其外側曰肘。

王導溫嶠俱見明帝。帝問溫：『前世所以得天下之由？』溫未答，頃，王曰：『溫嶠年少未諳，臣爲陛下陳之。』王迺具敍宣王創業之始，誅夷名族，籠樹同己。及文王之末，高貴鄉公事明帝聞之，覆面箚牀曰：『若如公言，胙安得長。』

○見方正第五。○建置社稷曰胙。

庾公欲起周子南，子南執辭愈固。庾每詣周，庾從南門入，周從後門出。庾嘗一往奄，至，周不及去，相對終日。庾從周索食，周出蔬食，庾亦彊飯極歡。并語世故，約相推引，同佐世之任。既仕，至將軍二千石而不稱意。中宵慨然曰：『大丈夫乃爲庾元規所賣。』一嘆遂發背而卒。

○晉周邵，字子南，與南陽霍湯隱於廬山。庾亮拔為鎮蠻護軍，西陽太守。○奄，忽也。

桓公臥語曰：『作此寂寂，○將為文景○所笑。』既而屈起坐曰：『既不能

懷○芳後世，亦不足復遺臭萬載邪？』

○寂寂，靜貌。○司馬昭與司馬師也。○丞，古流字。

簡文見田稻不識，問『是何草？』左右答『是稻。』簡文還，三日不出。云：『寧有

賴其末而不識其本。』

紕漏第三十四

元皇初見賀司空，言及吳時事，問「孫皓燒鋸，截一賀頭是誰？」司空未得言，元皇自憶曰：「是賀邵。」司空泣曰：「臣父遭遇無道，創巨痛深，無以仰答明詔。」元皇愧慚，三日不出。

○賀邵，即賀循之父。

殷仲堪父○病虛悸，聞牀下蟻動，謂是牛鬪。孝武不知是殷公，問仲堪：「有殷病如此不？」仲堪流涕而起曰：「臣進退唯谷。」

○晉殷師，字師子，仕至驃騎咨議，即仲堪之父。○詩大雅桑柔第九章云：「人亦有言，進退維谷。」毛公注曰：「谷，窮也。」

惑溺 第三十五

賈公闓○後妻郭氏醋妒。有男兒名黎民，生載周。充自外還，乳母抱兒在中庭。兒見充喜踊，充就乳母手中鳴之。郭遙望見，謂充愛乳母，即殺之。兒悲思啼泣，不飲它乳，遂死。郭後終無子。

○即賈充。見方正第五。

孫秀○降晉，晉武帝厚存寵之。妻以姨妹蒯氏，○室家甚篤。妻嘗妒，乃罵秀為貉子。○秀大不平，遂不復入。蒯氏大自悔責，請救於帝。時大赦，羣臣咸見。既出，帝獨留秀。從容謂曰：「天下曠蕩，○蒯夫人可得從其例不？」秀免冠而謝，遂為夫婦如初。

○孫秀，字彥才，吳郡人。武帝以為驍騎將軍，交州牧。○蒯氏，襄陽人。南陽太守蒯鈞之女。○

貉，本作貌。似狐善睡。其子名貍。④曠，寬大也。蕩，排盪去穢垢也。

王安豐婦常卿安豐。安豐曰：「婦人卿婿，於禮爲不敬，後勿復爾。」婦曰：「親卿愛卿，是以卿卿。我不卿卿，誰當卿卿？」遂恆聽之。

王丞相有幸妾姓雷，頗預政事，納貨。蔡公謂之雷尙書。

仇隱 第三十六

孫秀既恨石崇不與綠珠。○又憾潘岳昔遇之不以禮。○後秀爲中書令，岳省內見之，因喚曰：「孫令憶疇昔周旋不？」秀曰：「中心藏之，何日忘之。」岳於是始知必不免。後收石崇歐陽堅石，○同日收岳。石先送市，亦不相知。潘後至，石謂潘曰：「安仁，卿亦復爾邪？」潘曰：「可謂白首同所歸。」潘金谷集詩云：「投分寄石友，白首同所歸。」乃成其讖。⑤

○石崇有妓人綠珠，美而工笛。孫秀使人求之，崇不許。○岳父文德爲琅邪太守，孫秀爲小東

給使。岳數蹴躡秀，而不以人遇之。○見規箴第十。○歐陽建，字堅石，渤海人。爲馮翊太守。

⑤讖，前定徵兆之言也。

劉瓛兄弟○少時爲王愷所憎。嘗召二人宿，欲默除之。令作阮，阮畢垂加害。

矣。石崇素與璵琨善。聞就愷宿，知當有變，便夜往詣愷，問：「二劉所在？」愷卒迫不得諱，答云：「在後齊。」中眠。石便徑入，自牽出同車而去。語曰：「少年何以輕就人宿。」

○劉璵，晉書作劉輿，字慶孫，太尉劉琨之兄。爲東海王越左長史。琨見言語第二。○齊與齋同。

王右軍素輕藍田。藍田晚節，論譽轉重，右軍尤不平。藍田於會稽丁艱，○停山陰治喪。右軍代爲郡，屢言出弔，連日不果。後詣門自通，主人既哭，不前而去，以陵辱之。於是彼此嫌隙大構。後藍田臨揚州，○右軍尙在郡。初得消息，遣一參軍詣朝廷，求分會稽爲越州。○使人受意失旨，大爲時賢所笑。藍田密令從事數其郡不法，以先有隙，令自爲其宜。右軍遂稱疾去郡，以憤慨致終。

○王述爲會稽內史時，丁母憂去職。○述服闋，代殷浩爲揚州刺史。○當時未置越州，至隋

始以會稽郡置越州。

商務印書館出版

學生國學叢書

詩經

一册六角

經天授輯註 本書就詩之本質上分爲四類(一)抒情詩(二)描寫詩(三)頌詩(四)賦詩詩選材取當時古文字及富有文藝價值之詩(三)頌詩詩選材取當時古文字及富有文藝價值之詩(四)賦詩詩選材取當時古文字及富有文藝價值之詩

禮記

葉紹鈞輯註 定價七角

本編所采都屬通論禮樂政制及國言哲理各篇古人之所謂「禮」其源發何者不難從此窺見註釋則繁取要務期明當卷首有緒言一篇將禮記一書扼要解釋是助理解

春秋公羊傳

許爾民註 定價七角

選錄原書十之五六皆取其重要尤有意義者註文采輯各家之說務求精當於其繁晦期學者一目而得其解通其理公羊於經學爲要籍且爲自來引起論說之對象研究國學者自宜鑒覽及之

晏子春秋

適選註 三角五分

晏子春秋並非晏子的作品惟文辭樸茂宗旨正當故本叢書仍加選輯原書二百十五章茲編精心抉擇刪去章首相同及無關重要的材料共存八十八章

史記

胡懷琛選註 一元四角

所選本記世家列傳三十五篇爲史記最重要之部份註解精確考訂宏博卷首有長序詳論史記在史學與文學上的價值以及吾人讀史記的方法

新序說苑

選莊註 定價五角

二書均漢劉向所作古人嘉言懿行類此稍傳於後茲以其體例相同合刊一册凡重複者錄一不違二相現代情形者亦不據原書文字多訛誤脫落此編依據諸本詳爲校訂

文史通義

章錫琛註 定價七角

章實齋先生文史通義一書在史學上爲最有價值之著作此編選錄其中最重要各篇爲之標點分段並加音釋讀者得此極易研究

商 務 印 書 館 出 版

學 國 生 學 叢 書

荀子

葉紹鈞輯註 定價六角
書選十二篇，均荀子之重要著作，標點明晰，註釋精博。編首附荀子略傳，並述學術思想概況，尤便考證。

管子

唐敬吳輯註 定價六角
本書選錄凡二十篇，均可信為管子之本身學說，書中古文古訓，錯字錯簡，前之觸目荆棘，紛塞而不可解者，本書根據各家考證，訂正無遺。

子孟

繆天授輯註 定價五角
此書節取孟子內容，按現代治學方法，分成七類，詳論其學術思想，示學者以研究之方。

莊子

沈雁冰輯註 定價四角
此編選莊子之精華共十二篇，註解則擇善而從，簡確易說，卷首新序述莊子思想概況及歷來學者對於莊子的研究，尤為初學之助。

墨子

唐敬吳輯註 定價六角
凡墨子之重要各篇均已采入，註釋根據善本，詳明精確，論字錯簡，悉經訂正，極便閱覽。

列子

唐敬吳輯註 定價四角
此書以本館影鐵琴銅劍樓北宋本為標點底本，校正其謬誤，並為極精要之註釋。卷首撰長序一篇，對於列子書之真偽及由來，詳加論證，於各篇思想，亦條分縷析，敘其綱領。

韓非子

唐敬吳輯註 定價五角
本書采錄凡十九篇，韓非子之重要學說，盡括於此。校註精備，闕覽無錯舉之害。

淮南子

沈雁冰輯註 定價七角
自二十一篇中選出八篇，皆其尤重要者，卷首緒言，論其書之作者，篇跋，註本諸問題，皆學者應具之常識。

學生國學叢書
世說新語

此書作者權翻印必究

中華民國十七年六月初版

每册定價大洋陸角

外埠酌加運費匯費

選註者

崔朝

編輯主幹

王經

發行所

上海商務印書館

發行所

上海及各埠商務印書館

Students' Chinese Classics Series
LIU YI-CHIN'S SHORT STORIES
With Introduction and Notes by
TSUI CHAO CHING

Edited by
Y. W. WONG and KING CHU, M. A.
1st ed., June, 1928

Price: \$0.60, postage extra
THE COMMERCIAL PRESS, LTD.
Shanghai, China
All Rights Reserved

一二四一號

16051

82

72/080



5